

四朝宮史酌中志

卷

14

1475

26



門 1 4  
號 1475  
卷 26

昭和十五年  
十二月二日  
購求

酌中志卷之十六

內府衙門職掌

明宦官劉若愚撰

皇明祖訓所載設立內府衙門職掌品級立法垂後亦  
盡善盡美惟是間有祖訓所未及載或載而未詳者謹  
譜次梗概于左按內府十二監曰司禮曰御用曰內官  
曰御馬曰司設曰尙寶曰神宮曰尙膳曰尙衣曰印綬  
曰直殿曰都知又四司曰惜薪曰寶鈔曰鐘鼓曰混堂  
又八局曰兵仗曰巾帽曰針工曰內織染曰酒醋麵曰  
司苑曰浣衣曰銀作以上總謂之曰二十四衙門也此

西口元名之一  
外有內府供用庫司鑰庫內承運庫等處亦臚列於後  
司禮監掌印太監一員秉筆隨堂太監八九員或四五  
員設有象牙小牌一面長寸餘每日申時交接輪流該  
正凡每日奏文書自御筆親批數本外皆衆太監分批  
遵炤閣中票來字樣用硃筆楷書批之間有偏旁偶訛  
者亦不妨略爲改正最有寵者一人以秉筆掌東廠掌  
印秩尊視元輔掌東廠權重視總憲兼次輔其次秉筆  
隨堂如衆輔焉皆穿貼裏先斗牛次陞坐蟒先內府騎  
馬次陞橈杭祿米每陞一級則歲加祿米十二石各家

私臣曰掌家職掌一家之事曰管事辦理食物出納銀  
兩曰上房職掌箱櫃鎖鑰曰掌班領班鈐東西班答應  
官人曰司房打發批文書謄寫應奏文書其下則管帽  
管衣靴茶房廚房打聽官看莊宅各瑣屑事務也其餘  
大小衙門遇有應題奏事情皆先關白司禮監掌印秉  
筆隨堂而始行凡御前親近大臣如乾清宮管事打卯  
牌子其秩亦榮顯猶外廷之勳爵戚臣然皆得掌各衙  
門之印視其寵眷厚薄而欽傳昇之不拘資次司禮監  
提督一員秩在監官之上于本衙門居任職掌古今書

西口志卷之十六  
二  
籍名畫冊葉手卷筆墨硯綾紗絹布紙劄各有庫貯之  
選監工之老成勤敏者掌其鎖鑰所屬掌官四員或六  
員佐理之并內書堂亦屬之又經廠掌司四員或六員  
在經廠居住只管一應經書印板及印成書籍佛藏道  
藏番藏皆佐理之自提督以下則監官典簿十餘員第  
一員監官提督皇史宬并新房候轉提督俱輪流該正  
在廊下家宿專理皇城內一應禮儀刑名鈐束長隨堂  
差聽事各役關防門禁至逆賢擅政時令與文書房輪  
挨遇雙月十六日前往教場比試武職應襲其次六科

廊掌司六員或八員分東西兩房管精微科內外章疏  
及內官脚色履歷職名月報逃亡事故數目其次人數  
十員或八員管二十四員衙門山陵等處內官職級姓  
名撰寫每日傳行聖旨稽查門禁鈐束當差聽事題奏  
應行禮儀應頒賞賜其次六科廊膳黃寫字一員其次  
管掌寫字則按節令挨次題稟禮儀文書及賞例或百  
員或數十員分兩班四撥各若干人其班按十二支輪  
之曰頭頂整一日過夜曰守早從卯至申曰守晚從申  
至次日天明曰末頂整一日過夜方得下班歇息四日

也凡遇聖駕朝講遊幸穿麟補紅襖徹執藤條攔擋者皆掌司人數寫字也或轉經廠司禮監掌司者則每撥內另有一種衙門寫字共十餘員挨補而已自提督至寫字俱穿襖徹凡出入皇城各門軍接與擋道自內書堂奉旨派撥者名曰正途其次或乞恩奏保改陞者亞焉按祖宗舊制必照依欽錄姓名挨次魚貫陞轉罔敢攙越自逆賢擅政盡將厯練老成之人擯斥殺害內御司房或退出于冷淡衙門林衡等署西各以名銜前後分管之其在外之閣票在內之搭票一應旨意聖諭御

札俱由文書房落底簿發行所以如今凡掌司陞轉文書房者概削去司禮監銜都借列內官監銜其呈稟文書具見經手次第中然不過逆賢時如此耳先時從公挨轉雖非外衙門選擇委任尙可觀也而逆賢盡行斥退信用自己名下間有一派少不更事之人非制也按舊制後右門卽雲臺右門之北隆宗門之南坐東朝西房一連原名協恭堂每日早晨或非朝講之日及申時後掌印公過司房看文書秉筆隨堂人各有室挨次細看先先看文書房外本次看監官典簿文書自逆賢竊

柄其規矩蕩廢無遺所以事事苟且萬厯年間先監過  
司房例印公穿直身率秉筆等都是單身入室其親信  
掌班人等一人不得入機密禁近理應如此奈王體乾  
黨附無骨而逆賢不識字遂公然于乾清宮大殿上看  
文書或懋勤殿板房看文書硬拆實封高聲朗誦又挨  
次到各人直房那一家管文書看直房掌班司房官人  
肯不出宮門不張權勢如纍臣者乎不過大同房議批  
改正也如欲君德昭明左右得人須先振刷內書堂起  
欲章疏不洩漏權不旁落須有好明白印公不徇私不

憚勞仍復早晚過司房之舊制始如欲真才柄用中外  
不水火須大破逆賢積習爲官擇人不爲自己子孫擇  
官始在聖主自無一番一番如傳舍用人之理在內臣  
亦聞風觀感羣于爲善庶免本官勢倒連累退斥之患  
此必得虛明爲國淡名利忘報復之人柄政當朝立賢  
無方庶可辦此若只悠悠忽忽張三敗了便將他支派  
退淨李四敗了又如此趙甲王乙又如此縱有真心爲  
國束身自好者恐亦孤掌難鳴也東海逝波其奈之何  
哉凡御前面考隨堂秉筆自崇禎元年冬欽出事君能

致其身題者鄭大監之惠曹太監化淳中式始至十二年夏李太監承芳署司禮印時其名下顧三聘者亟圖速化遂密托己之名下王建鼎代選于衆時藝一篇被巡綽官發其事李不得已奏知聖上立將三聘責斃降建鼎淨軍發南海子看守牆鋪其年秋李褫職逮獄偶言及此纍臣曰重懲三聘甚當李曰何也纍臣曰彼草野寒士或迫于家貧親老行險徼倖世所間有罪不致死今三聘職叨典禮于御前面考隨堂秉筆自崇禎元年冬乃敢藐視憲典迫挾名下任性冥行至此便是犯

一欺字了于臣子之誼安乎嚴懲處死不爲苛也

內書堂讀書自宣德年間創建始命大學士陳山教授之後以詞臣任之凡奉旨收入官人選年十歲上下者二三百人撥內書堂讀書本監提督總其綱掌司分其勞學長司其細擇日拜聖人請詞林衆老師初則從長安右門入北安門出後則由北安門出入每學生一名亦各具白蠟手帕龍掛香以爲束脩至書堂之日每給內令一冊百家姓千字文孝經大學中庸論語孟子千家詩神童詩之類次第給之又每給刷印倣影一大張

其功課背書號書判倣然判倣止標日子號書不點句也凡有志官人各另有私書自讀其原給官書故事而已派年長有勢力者六人或八人爲學長選稍能寫字者爲司房凡背書不過寫字不堪或損汚書倣犯規有罪者詞林老師批數目付提督責之其餘小事輕則學長用界方打重則于聖人前罰跪再重扳著幾炷香扳著者向聖人前直立灣腰以兩手扳著兩腳不許體屈屈則界方亂打如雨或一炷香半炷香其人必眼脹頭眩昏暈僵仆甚而嘔吐成疾者此最酷最不近理之法

也凡強凌弱衆暴寡長欺幼者每賄托學長借公法以報私怨此第一陋套所宜痛革者也嘉靖年間讀書官人有年少貪睡者散學時人叫不起遂鎖在內半夜聞有呼殿聲儀衛甚衆云聖人到搜得此官人聖人曰旣得見我可謂有受教之分視有何書取來我親教之不要案有大統歷一冊乃指誦一週至天明向人言如此試令背誦一字不差又姜淮者年少有口值殷太史士瞻教書偶不在室淮戴其紗帽束其帶正在室中搖擺作勢殷粹至淮不知帶插橫解法殷不懌淮曰師父還



繫玉帶哩此銀帶何足貴殷笑而釋之歸寓向夫人備道相笑萬厯初殷入相東玉夫人尙憶淮名白殷托馮太監保察之見任御馬監奉御隨令赴殷寓拜見師母殷山東人罷相致仕時淮送至天津始回凡讀書官人遇令節朔望亦放學一日其每日暮放學則排班題詩不過雲淡風輕之類按春夏秋冬隨景而以腔韻題畢方擺列魚貫而行有不知而攙越者必羣打詬辱之別衙門官遇學生排班行走必拱手端立讓過卽司禮老公遇之亦然凡各衙門缺寫字者卽具印信本奏討奉

旨撥若干名卽挨名給散至逆賢時此制大壞無餘殊可嘆也凡內書房官人已撥散將完無人讀書該監題知于二十四衙門官占官下及監工改讀書以補之其實事久弊生冥頑貪詐或麤獷克猾總非作養人才良法也如欲痛改前轍只在聖主右文主持于上好印公提督掌司振飭于下不吝教不憚煩詞林老師激勸于外不倚勢有良心學長曉事年長應之于中不三五年卽有成效十年內外國家自享真才之用消元黃之戰于廟堂衍無疆福澤于億世願惟在位者加意何如耳

禮儀房署在東安門外舊都府草場之東向南提督太監一員掌印秉筆攝之掌司及寫字管事各數員本房長隨數員掌管一應選婚吉禮每年四仲月選乳媪生男十口生女十口月給食料在妳子府居住凡宮中有喜鋪月子房生男生女各一二口在文華殿西北臨河之小房住及報生皇子則用生女妳口皇女則用生男妳口彌月剪髮百日命名及請髮畱髮入囊冊立冊封選妃打扒角選駙馬一應禮儀皆經理之

中書房掌房官一員散官十餘員係司禮監工年老資

深者挨轉專管文華殿中書所寫書籍對聯扇柄等件承旨發寫完日奏進御前凡宮中糊飾如不放外匠只昇監工并學手藝牌子糊飾挨轉此處并御前作至貧老無依則發外經廠看守以待斃焉凡司禮監掌印秉筆隨堂故後各有牌位送外經廠供安各有影像送西直門外大佛寺供安看廠監工守寺僧人侍香火不絕也

御前作掌作官一員散官十餘員亦是監工年老資深者挨轉專管營造龍牀龍桌箱櫃之類合用漆布桐油

銀硃等件奏准于甲字庫關支已上二處亦掌印或秉筆提督之

司禮監外差南京正副守備太監二員關防一顆其文曰南京守備太監關防護衛雷都為三千里外親臣轄南京內府二十四衙門孝陵神宮監官奏進神帛鱗魚苗薑等鮮各衙門印文比北京多南京二字

孝陵神宮監掌印太監一員別衙門可陞不係司禮監也轄本陵僉書掌司及謫種菜淨軍人等

天壽山守備太監一員關防一顆轄十二陵掌印僉書

工部廠掌司等官凡每年清明親率各掌印來京奏添土木每歲進松花黃連茶核桃榛栗等果各陵皆有瞭果廠在京

鳳陽守備太監一員關防一顆護衛皇陵轄僉書數十員兼管高牆犯罪宗室

湖廣承天府守備太監一員關防一顆僉書數十員轄承德荆襄地方護衛顯陵徵收籽粒每年進茶扇葛布香茶手巾

太嶽太和山鎮守太監一員關防一顆轄均州等處經

管本山香火羽流進榔梅鷹嘴筍騫山茶等件

正陽等九門永定等七門正副提督二員關防一顆已上六處秩在文書房監官之上并孝陵掌印各有勅諭又正陽等門掌司一員秩視六科廊然不隨內轉缺則補之近已裁革不補

大壩等馬房正副提督太監二員勅諭關防秩在文書房之次外衙門官亦間任之

蘇杭織造太監一員亦有勅諭關防秩視秉筆而安逸尊富過之萬歷年間惟孫太監隆先監之同年也多學

善書會刻通鑑總類中鑒錄等書所造清謹堂墨款製精巧猶方于魯程君房而劑料精細為殊勝焉神廟最重之今不易得也隆在蘇杭日久又以暇日重修西湖蘇堤從容儒雅蓋事辦而民不擾大得東南民心至今思之未艾也掌印王體乾秉筆王文致皆隆名下也今上卽位憫東南財物凋敝特停止不差

東廠自成祖卽位永樂十八年始置其外署在東安門外迤北提督太監一員關防一顆勅諭最為隆重凡內官奉差關防皆曰某處內官關防惟此處篆文曰欽差

西中志卷之十六  
總督東廠官校辦事太監關防自泰昌元年九月先帝登極後歷掌東廠者鄒義沈蔭宋晉也至天啟四年春逆賢掌廠其年夏李永貞偶分批一疏彙臣見面上關防因稟永貞曰此廠何如直省提督學道關防彼俱因避御名題請改鑄此臣子尊君之體不忍缺者東廠係內府親近衙門何三四年尙用舊關防無人題請改鑄可乎永貞始竊歎稱曰老爹素通六經可謂識體卽轉白逆賢曰真字我尙不識這篆字誰能認得隨令廠司房呈稿具題改鑄更官校曰官旗也及六年以後內臣

紛紛出鎮值陶文討鑄關防不過曰內臣內官足矣不意閣票欠詳先帝御札于閣票內誤增太監二字王體乾等不達體制含糊奉行未之奏正聞近日鑄給者亦多稱太監各人原疏可證也本廠設掌貼刑千百戶二員掌貼領班司房四十餘名圓帽卓靴穿直身十二顆管事圓帽襖襪卓靴其擋頭辦事百餘名分子丑寅卯十二顆圓帽襖褶白靴番役千餘名外署大廳之左小廳供岳武穆像一軸廳後磚影壁雕狻猊等獸狄公斷虎故事存此者良有深意也大廳西有祠堂內供從來

西中志卷之十一  
三  
掌廠職名牌位前有坊曰百世流芳稍南有獄一處凡重犯則繫此輕犯于連則在署外之店也署西南有門以通出入向南大門不恆開也近年將西門改牆而井中水無故汎濫是以鄭太監之惠李太監承芳相繼褫職逮刑部獄人或以爲宜仍開西門爲妥云凡中府等處會審大獄北鎮撫司拷訊重犯本廠皆有人聽記其口詞一本撥打數一本于當晚或次早奏進每日訪看兵部有無進部有無塘報京城各門皇城各門關防出入俱有事件奏聞或地方失火或雷擊何物亦奏聞之

每月晦日奏報在京雜糧米豆油麩之價此祖宗良法深意欲九重之上覽物價之多寡卽知農歲之豐歉以商賈之通塞卽知道路之險夷總畱意民瘁第一義也凡皇城禁地人命亦皆有事件其內署在東上北門之北街東混堂司之南萬厯初年馮太監保奏建古槐森鬱解宇肅然凡各處辦事打來事件皆到內署先見廠公心腹內官發司房刪潤奏之逆賢專政時所獨信任者李朝欽耳天啟元年二月因口口之患將元武門外入賣貨物大市奉旨挪改于東安門外戎政府街民間

西中志卷之十六  
謠曰大市去矣至七年秋皇極等殿告成復奉聖諭前朝後市之義仍將大市移入元武門外時先帝違和久逆賢因飭夜禁被巡捕提督張體乾一言所激日夜巡非不禁奈有內裏犯夜巡軍那敢問又因容氏之母路遇一醉內官爭道惡罵馳去逆賢大怒遂猝布旗番卽于初三日晚捉得夜行內官陳烏眼等十餘人聽李朝欽之言乘大市之日賢親自到內東廠將犯夜內官各狠打一頓有發鳳陽有發南海子者致死于路者數人逆賢坐板由元武門入王體乾等凡在河邊居住掌家

皆望塵跪伏道旁俟賢過方起其市上買賣人觀看亦有叩頭匍匐俟過而方起者此逆賢肆毒作威之末一著也內署有扁曰朝廷心腹有至聖堂有井其掌廠公宮中直房有欽給密封牙章一枚凡事件應封奏者以此鈐封逆賢擅政更造一差大者曰東廠密封凡在賢左右念本章者蘇雄陳福壽李朝欽裴有聲也每日清晨叩頭旁立挨次回通本封本票本話者李永貞石元雅涂文輔三人如孫進郝隱儒等概不聞也凡先帝御前奏念事件亦止此三人李朝欽等亦不及也

內官監掌印太監一員其所屬有總理管理僉書典簿  
掌司人數寫字監工自典簿以下分三班宮中過夜每  
班掌司第一人曰掌案所管十作曰木作石作瓦作搭  
材作土作東作西作油漆作婚禮作火藥作并米鹽庫  
營造庫皇壇庫裏冰窖金海等處凡國家營建之事董  
其役御前所用銅錫木鐵之器日取給焉外廠甚多各  
有提督掌廠等官真定府設有抽印木值管理太監一  
員則內官監之外差也四年一撥只有本監公文無敕  
書關防及寶坻縣收籽粒西湖河差大石窩白虎澗等

處各有提督俱外差也凡外方修建分封藩王府第亦  
是管理外差也須數萬金營求方能到手領敕書關防  
前去工竣卽回天啟元年湖廣衡州府修桂藩府第管  
理翟應魁遞銀四萬未能得黃用費五萬卽得之餘差  
可以例其多寡矣無惑乎桂藩地基不堅殿宇傾塌也  
凡大行帝后陵寢妃嬪皇子女薨修造墳塋及完姻修  
理府第皆其職掌天啟元年春慶陵工興御前所發帑  
銀五十萬卽有分侵八萬者矣欲堅美完善得乎至七  
年春今上大婚禮成藩邸殿宇及陳設器具俱塗飾草



率皆李永貞貪其侵冒包工了事漫不加意之所致也  
可恨極矣永貞伏法而經管員役漏網謂非孔方之力  
哉  
御用監掌印太監一員裏外監把總二員猶總理也有  
典簿掌司寫字監工凡御前所用圍屏擺設器具皆取  
辦焉有佛作等事凡御前安設硬木牀棹櫃及象牙花  
梨白檀紫檀烏木鸚鵡木雙陸棋子骨牌梳櫛檯甸填  
漆雕漆盤匣扇柄等件皆造辦之仁智殿有掌殿監工  
一員掌管武英殿中書承旨所寫書籍畫扇奏進御前

亦猶中書之于文華殿中書也

司設監掌印太監一員有總理僉書等官如內官監而  
所職掌者鹵簿儀仗圍幙褥墊各官冬夏簾涼席帳幔  
雨袱子兩頂子大傘之類事最煩苦遠不逮御用監內  
官監有盈餘肥潤也如遇御前打點庫藏擡箱則此三  
衙門之人皆任重擡運不敢憚勞

御馬監掌印太監一員有監督提督四衛營勇士小廝  
有監官典簿掌司寫字拏馬象房掌房等官牙母象九隻  
各居一房缺則外象房補之金鞍作長隨房等處各有

監工本監象房之東有裏草欄草場皇城之外有天師菴草場舊都府草場天啟六年夏舊草場失火逆賢率內外官員軍士人等救撲三日始息都城東北有大壩等二十四馬房大壩城垣逆賢重創一新李魯生巡青之疏所諛者是也凡逆賢出外到此則于城樓上陞座飲酒至夜則花礮巧線盒子烟火之類皆在城下放看如元宵焉

神宮監掌印太監一員司禮監監官或文書房無力者陞之有僉事掌司十餘員在端門之左九廟在焉四孟

之朔聖駕親享之正旦及別朔或遇日食則改卜于初五前後行其餘節令祀事惟謹卽外太廟也其地無敢畜犬者萬厯年間掌印杜用養一獬豸小狗最爲珍愛東廠李太監後訪知之指爲違禁不敬聲欲參奏費千餘金方得免

尙膳監掌印太監一員光祿寺西門提督太監一員西華門內裏總理太監一員管理僉書掌司數十員寫字監工及外牛房羊房等廠監工百餘員而擡供養官撥子長隨各數十員光祿涼樓醬房逢七等項各有監工

坐家名色職掌造辦每日早午晚奉先殿供養膳品乾  
清宮等官一號殿仁壽宮等宮眷月分廚料各有差等  
凡在御掌印秉筆管事牌子暖閣近侍及外之內閣文  
華武英殿中書畫士棹兒銀兩咸光祿寺職掌用典簿  
關防緘封每月酒飯一棹折銀十兩有奇半棹者五兩  
有奇到每月晦照欽賞數目坐名頒給之光祿寺志可  
考也凡遇大典禮萬歲爺陞大座則司禮監催督光祿  
寺備辦茶飯鐘鼓房承應九奏之樂有所謂炮鳳烹龍  
者鳳乃雄雉龍則宰白馬代之耳至如南京等處進各

樣鮮品皆屬收納天啟以前凡聖駕每日所進之膳俱  
司禮監掌印秉筆掌東廠者二三人輪辦之近年改由  
此監亦節省意至十三年復令司禮掌印掌廠秉筆炤  
先年例挨月輪流辦膳仍遵祖制也

尙寶監掌印太監一員僉書等官數十員職掌御用寶  
璽敕符將軍印信其所可知者尙寶司凡所領者曰皇  
帝奉天之寶郊天齋醮用之曰尊親之寶上尊號用之  
曰親親之寶有大小二顆與藩府用之誥命之寶敕命  
之寶廣運之寶則用之最多也御前之寶則宮中庫藏

箱鎖用之曰御藥謹封則牙刻者也御藥房用之凡敕命遠出者仍用一黃紙封套上下悉用牙刻方寶封識之其文曰丹符出驗四方之寶其餘咸玉刻也凡寶皆內尚寶女官掌之遇用寶則尚寶司以揭帖赴尚寶監監請旨然後赴內司領取歲用寶三萬餘顆歲用寶色銀六十餘兩工部虞恒司辦進別項供億不盡載也其餘寶璽尙多不恆用天啟甲子冬河南巡撫程紹遣副使張夢鯨進到玉璽玉質瑩潔款制渾朴其白文曰受命于天既壽永昌似小篆不甚古角無剝缺的非秦璽

想是宋元時偽造者惟閣臣魏廣微誇大其詞從與逆賢播告中外以爲此璽之進正在萬方慶祝之前又值朝政維新之會顯是瑞應實所以熒惑先帝受賀稱慶藉肆報復云

印綬監掌印太監一員僉書掌司數十員職掌古今通集庫并鐵券誥敕貼黃印信圖書勘合符驗信符諸事及南京解文武誥軸凡追奪誥命交納本監會同該科給事中中書舍人於勘合底簿內附寫爲事緣由于本監後小門之西傍河牆焚化

直殿監掌印太監一員僉書等官數十員職掌皇極建  
極中極武英文華殿庭樓閣廊廡灑掃之役最勞苦冷  
局無大廳公署也

尙衣監掌印太監一員管理僉書掌司等數十員掌造  
御用冠冕袍服履烏靴襪之事兵仗局之南舊監庫之  
北卽本監裁縫匠役成造御用之袍房也又名曰西直  
房萬厯時凡造上用袍服之裏合用杭紬等絹例具尺  
寸數目于東廠太監處取辦之不知今尙如此否也萬  
厯三十三年冬御前偶失珍珠袍一件神廟震怒命先

監矩親至袍房拷問數次時掌管內官王乾王進王保  
三人素不睦而互訐陷之先監怒其愚狡察其實冤竟  
不爲嚴旨所拘再四撻鞫了無盜袍證據時王進孱弱  
被掠病亡王乾等奉旨降淨軍結局其後數年宮中有  
人云此袍是一貴顯官女偷出付其答應內官拆碎變  
賣人始追感先監之明允淑問也倘希旨煅煉則支連  
蔓引含冤而死者寧能再生乎益知執法者凡事宜虛  
公詳慎可也

都知監掌印太監一員甚不顯貴餘皆本監寫字長隨

西華志卷之十六  
各有青紅執事衣服凡聖駕出朝謁廟等項在前警蹕  
清道者卽此監之官也執骨朶身穿鸚哥等補子戴平  
巾或官帽亦有穿圓領裋褐者其人極寒苦難以陞轉  
下下衙門也

惜薪司掌印太監一員總理數十員僉書掌道寫字監  
工數十員各外廠又數十員專管官中所用柴炭及二  
十四衙門山陵等處內臣柴炭每月初四十四廿四日  
開元武門放夫匠及打掃淨軍擡運堆積糞壤每年春  
暖開長庚蒼震等門率夫役淘浚宮中溝渠正旦節安

彩粧凡遇冬寒宮中各銅缸木桶該內官添水湊安鐵  
錫其中每日添炭以防冰凍備火災候春融則止皆惜  
薪司事也凡官中所用紅籬炭者皆易州一帶山中硬  
木燒成運至紅籬廠按尺寸鋸截編小圓荆筐用紅土  
刷筐而盛之故名曰紅籬炭也每根長尺許圓徑二三  
寸不等氣煖而耐久灰白而不爆如經伏雨久淋性未  
過盡而火氣太熾多能損人條令眩暈昏迷發嘔大人  
尙可皇子女嬰幼何堪又宮中咸木做地平牆壁多缺  
土氣凡乳母畏寒皇子女或中此毒屢致薨夭良可痛

也順天府歲供糯米十五石五斗永平府歲供紅棗一萬五千五百七十觔于紅籬炭交納之廠中舊有香匠塑造香餅獸炭又塑造將軍或福判仙童鐘馗各成對高二尺許用金彩裝畫如門神黑面黑手以存炭制名曰彩粧于十二月廿四日奉安于宮殿各門兩傍此亦歲暮植將軍炭于門傍之遺意也至次年二月初二日仍擡歸本廠修補粧新臨年節再安逆賢專政則各增而大之所費百倍于前傀儡體做法高八九尺丈餘不等穿以真正綾絹紵紬備以真正弓矢兵器鬚眉直豎

猛惡如生又恐無知之人戲弄損壞凡該地方近侍必明燈看守雖冰雪寒夜不敢遠離必交接明白人人敢怒而不敢言也凡隆德等殿修建齋醮焚化之際用楊木長柴官中膳房用馬口柴內官關領則片柴也外有北廠南廠西廠東廠新西廠新南廠等處各有掌廠僉書監工貯收柴炭以聽關支

鐘鼓司掌印太監一員僉書數十員司房學藝官二百餘員掌管出朝鐘鼓凡聖駕朝聖母回及萬壽聖節冬至年節陞殿回宮皆穿有補紅帖裏頭戴青攢頂綴五

色絨在聖駕前作樂迎導宮中陞座承應凡遇九月登高聖駕幸萬壽山端午鬪龍舟插柳歲暮官中驅儼及日食月蝕救護打鼓皆本司職掌西內秋收之時有打稻之戲聖駕幸旋磨臺無逸殿等處鐘鼓司扮農夫媪婦及田畯官吏徵租交納詞訟等事內官監衙門伺候合用器具亦祖宗使知稼穡艱難之美意也又過錦之戲約有百回每回十餘人不拘濃淡相間雅俗並陳全在結局有趣如說笑話之類又如雜劇故事之類各有引旗一對鑼鼓送上所扮者備極世間騙局醜態並閨

壺拙婦駮男及市井商匠刁賴詞訟雜耍把戲等項皆可承應又御用監武英殿畫士所畫錦盆堆則名花雜果或貨郎擔則百物畢陳或將三月韶光富春山子陵居等詞曲選整套者分編題目畫成圖屏按節令安設總皆祖宗原因聖子神孫生于宮壺之中長于阿保之手所以製此種種作用無非廣識見博聰明順天時恤民隱之意也猗歟盛哉意淵微矣又上元之前或于乾清宮丹陛上安七層牌坊燈或壽皇殿安方圓鼇山燈有高至十三層者派近侍上燈鐘鼓司作樂讚燈內府



西口志卷之十六  
供用庫備蠟燭內官監備奇花火礮巧線盒子烟火火  
人火馬之類誠所謂瞬息之樂粧點太平或藉此孝娛  
聖母未爲不可但火燭擔驚糜費甚鉅思及民瘼實可  
惜焉又木偶戲其製用輕木雕成海外四夷蠻王及  
仙聖將軍士卒之像男女不一約高二尺餘止有髻以  
上無腿足五色油漆彩畫如生每人之下平底安一樺  
卯用三寸長竹板承之用長寸餘濶數尺深二尺餘方  
木池一箇錫鑲不漏添水七分滿下用橈支起又用紗  
圍屏隔之經手動機之人皆在圍屏之內自屏下游移

動轉水內用活魚蝦蟹螺蛙鰕鱔萍藻之類浮水上聖  
駕陞殿座向南則鐘鼓司官在圍屏之南將節次人物  
各以竹片托浮水上遊鬪頑耍鼓樂喧哄另有一人執  
鑼在旁宣白題目贊傀儡登答道揚喝采或英國公三  
敗黎王故事或孔明七擒七縱或三寶太監下西洋八  
仙過海孫行者大鬧龍宮之類惟暑天白晝作之如耍  
把戲耳其人物器具御用監也水池魚蝦內官監也圍  
屏帳帷司設監也大鑼大鼓兵仗局也乍觀之似可喜  
如頻作之亦覺煩費無餘矣先帝最好武戲于懋勤殿

西中志卷之十六  
陞座多黠岳武穆戲文至瘋和尚罵秦檜處逆賢常避而不視左右多笑之自天啟六年以後凡御前插科打諢本有鐘鼓司僉書王進朝綽號王癩子抹臉談諧公然稱贊惜薪司怎樣軫恤商人內府庫怎樣米積天堆東廠怎樣釐奸剔弊寶和店怎樣裕國通商內修朝政外鎮邊疆或稱好箇魏公公或誇好箇魏太監逆賢居之不疑自以爲美先帝聖顏亦爲喜悅回想憲廟時汪直擅權尙有懷恩之流居帝左右所以阿丑敢譎諫也今王體乾旣熟軟巧媚在王癩子不過俳優賤役自然

因而化之可嘆也已因想稱功頌德又寧止章疏間哉五年之九月九日駕幸萬壽山鐘鼓司太監邱印執板清唱雒陽橋記內之攢眉黛鎖不開者一套至六年九月登高邱印仍唱此曲識者已哂其不合景失大體矣撫今思昔亦莫之爲而爲良非佳兆云神廟孝養聖母設有四齋近侍二百餘員以習宮戲外戲凡慈聖老娘娘陞座則不時承應外邊新編戲文如華岳賜環記亦會演唱是日神廟侍側見權臣驕橫寧宗不振至云政由甯氏祭則寡人神廟亦矚目不言者久之先是仁聖

陳老娘娘在時凡遇節令聞必恭請兩宮聖母于乾清宮大殿陞座神廟先在雲臺門之下朝北立候仁聖老娘娘轎至景運門慈聖老娘娘轎至隆宗門神廟卽居中朝北跪接候兩轎俱至乾清門方起中宮王娘娘扶請仁聖老娘娘皇貴妃鄭娘娘扶請慈聖老娘娘入宮陞座神廟遞酒膳下氣怡聲膝行叩拜周旋中禮傾心孺慕從來古今帝王聖孝所希覲也神廟又自設玉熙宮近侍三百餘員習宮戲外戲凡聖駕陞座則承應之又蔡學等四十餘人多怙侈不法自萬曆己亥秋俱下

鎮撫司獄至庚申秋光廟始釋然瘕死者已十之三四也此二處不隸鐘鼓司而時道有寵與暖殿相亞焉寶鈔司掌印太監一員管理僉書十餘員掌司監工數十員每年工部商人辦納稻草石灰木柴若干萬斤又香油四十五斤以爲膏車之用抄造草紙豎不足二尺濶不足三尺各用簾抄成一張卽以獨輪小車運赴平地晒乾類總入庫每歲進宮中以備宮人使用至聖上所用草紙係內官監紙房抄造淡黃色綿軟細厚裁方可三寸餘進交管淨近侍收非此司造也神廟至先帝

惟市買杭州好草紙用之祖宗時抄造印板及紅印聞其在庫中貯之其衙門左臨河後倚河有泡稻草池每年池中瀘出石灰草渣二百餘年陸續堆積竟成一卧象之形名曰象山有作房七十二間各具一竈突朝天名曰七十二克神凡空濶土地最宜種蔬今畦圃綿亘桔槔相聞若田家清野之象云

混堂司掌印太監一員僉書監工數員職司沐浴堂子惜薪司月給柴草內官監撥有役夫今事皆廢弛凡內官皆于皇城外有堂子之佛寺沐浴有選不中淨身男

子俗稱無名白卽古之私白者爲之擦澡討賞該寺僧擅其利而無名白分其餘潤故內官全不來司沐浴也銀作局掌印太監一員管理僉書數員寫字監工數十員專管造金銀鐸針枝箇桃杖金銀錢金銀豆葉豆者圓珠重一錢或三五分不等豆葉則方片其重亦如豆不拘以備欽賞之用又造花銀每錠十兩不等止可八成又祖宗舊制有票兒銀者重十兩五兩三兩一兩至一錢之方塊也其色止有六七成有分兩印子逆賢擅政久廢不造止以細絲銀分賞遂失祖宗節省之意可

惜甚焉

浣衣局掌印太監一員僉書等數十員惟此署不在皇城內在德勝門迤西俗稱漿家房者是也凡官人年老及有罪退廢者發此局居住內官監例有供給米鹽待其自斃以防洩漏大內之事法至善也天啟七年十一月客氏笞死于此

兵仗局掌印太監一員管理僉書十餘員軍器庫提督一員掌關防司一員掌司寫字監工數十員卽掌造刀鎗刺戟鞭斧盔甲弓矢各樣神器又火藥局一處屬之

宮中元宵上鼇山頂上之燈例點放神器三位則監工事也凡每年七夕宮中乞巧小針并御前鐵鎖鍍針剪之類及日月蝕救護鑼鼓響器宮中做法事鐘鼓鏡鈸法器皆隸之是以亦稱爲小御用監也逆賢時凡解寧遠皮島等處佛郎機等件本局庫中物爲多

巾帽局掌印太監一員管理僉書等數十員職掌內官內使小火者平巾官帽每年入夏據見在員數具題移交工部至冬初卽于節慎庫領銀十餘萬分散內官內使人等靴料凡有羨餘繳進御前凡新陞秉筆卽送朝

衣冠笏帶鞋一分凡選中駙馬冠靴中使之家正帽闌者之猪嘴帽插柳跑馬勇士之圓帽藩王之國其旗帽靴帶若干分皆本局造送奏于工部支領工價其署後臨河有梓潼帝君廟傳云神像是順流漂入至此不動遂祠祀之籤最靈

針工局掌印太監一員餘與巾帽局同職掌內官人等冬衣夏衣每年遞散一次遇辰年戌年冬散鋪蓋銀一次凡宮中做法事揚幡棹圍等件皆隸焉凡內官會賜蟒衣退出官及病故者各具本交還本局收也

內織染局掌印太監一員總理僉書等數十員掌染造御用及宮內應用緞匹絹帛之類有外廠在朝陽門外澣濯袍服之所又有藍靛廠在都城西亦本局之外署也萬曆三十六年始建西項娘娘廟于此其地素窪下時都中有狂人倡爲進土之說凡男女不論貴賤筐擔車運或囊盛馬馱絡繹如織甚而室女豔婦藉此機會以恣遊觀坐二人小轎而懷中抱土一袋隨進香紙以徼福焉可笑也此先監沒後光景也又數年神廟宮中偶興掉城之戲于御前十餘步外畫界一方城于城內

斜正十字分作八城挨寫十兩至三兩止令司禮監掌印東廠秉筆及管事牌子遞以銀豆葉八寶投之落于某城卽炤數賞之若落进城外及壓線者卽收其所擲焉至戊午年遂有建口口口口之變失撫順開原等處此戲始不作也

酒醋麪局掌印太監一員管理等官與別局相若職掌內官宮人食用酒麪諸物浙江等處歲供糯米小麥黃豆及穀草稻皮白麪有差以備御前宮眷及各衙門內官之用與御酒房不相統轄

司苑局掌印太監一員管理等官同前職掌宮中蔬果及種藝之事歲用黑豆穀草山東等處歲供之御前所用瓜菜茶料俱此局與林衡等署上林苑南海子同辦之已上總謂之廿四衙門惟浣衣局在皇城之外也內府供用庫掌印太監一員總理僉書寫字監工共百餘員專司皇城内二十四衙門山陵等處內官食米每員每月四斗神廟時張明掌此印插稻子或爛米甚而至有三斗半者孫成掌此印將天廚之米亦罄盡有油蠟等庫廳前懸一木魚長可三尺許以示有餘糧之意

後庫上有瓦鴿子一相傳已久不知何所取意也凡御前白蠟黃蠟等沉香等香皆取辦于此庫其印非九重倚毗最有寵眷者不得掌也司禮掌印東廠秉筆管事牌子等歲賜祿米各于季冬奏過給散之宮中各長街設有路燈以石爲座銅爲樓銅絲爲門壁每日晚內府庫監工添油點燈以便巡看關防逆賢擅政盡廢之以便冥行莫敢言者矣

司鑰庫掌印太監一員管理僉書等官數十員凡寶源局等處鑄出制錢該部交進本庫備御前討取賞賜之用庫中積有歷代古錢洪武以來大錢逆賢引導先帝濫賜左右幾無子遺一日御前舊錢內偶得天啟錢大小數枚色甚古徧問人無知者李永貞到直房向纍臣說之纍臣隨告假到外直房子史內及袁氏叢書玉篇等書內查出梁蕭莊魏元法僧及南詔俱有此年號及萬歲爺共四矣此進擬年號之宰相不多讀書之明驗也惜纍臣身爲人役不能親到御前奏對而反爲招妬之媒豈非命耶凡乾清宮等門及東華午門鎖鑰皆本庫監工于五更三點時自宮中發出分啟各門其鑰卽



繳回其印文曰司鑰庫印俗曰天財庫

內承運庫掌印太監一員近侍僉書十餘員掌司等官數十員職掌庫藏在宮內者曰內東裕庫寶藏庫皆謂之裏庫其會極門寶善門迤東及南城磁器等庫皆謂之外庫也凡金銀紗羅紵絲織金閃色綿絨玉帶象牙瑪瑙珠寶珊瑚之類總隸之又浙江等處每歲夏秋麥米共折銀一百萬有奇卽國初所謂折糧銀今所謂金花銀是也候解到京于每季仲月由長安右門入徑進本庫交收此印及直殿監印鐘鼓司混堂靈臺等印皆

本衙第一員僉書挨掌不係貴近內臣掌至崇禎三年冬董實事發之後此印便改內臣掌也凡內臣陞玉帶于本庫領取及褫降病故其名下仍具本交還近年奉旨陞玉帶者亦如外臣自備殊公私兩便也南京供應機房太監一員則本庫外差有敕諭關防所謂漢府織造是也

靈臺掌印太監一員近侍僉書數員看時刻近侍三十餘員學習數十員凡遇收選官人則撥三四十名年幼者讀步天歌陰陽雜註天官星厯等書習寫算觀星氣

輪流上臺以候變異呈稟掌印具呈司禮監據實奏聞其占候書曰觀象玩占流星撮要等書皆抄寫授受不敢傳布于世外雖有抄本多差訛不全未足信也其教法極嚴比司禮監之學規凜肅也每年造歷係靈臺欽天監公同經管

御酒房提督太監一員僉書數員專造竹葉青等酒並糟瓜茄惟乾豆豉最佳外廷不易得也

牲口房提督太監一員僉書數員收養珍禽異獸有虎城羊房

彈子房掌房一員僉書數員專備彈弓所用泥彈大小有等以黃布袋盛之

刻漏房官十數員不係靈臺專管每日時刻畫則文華殿後每一時至卽令直殿監官入宮換牌每夜攢點後至天明則隆宗門外報幾刻水之第一聲而答應長隨接報第二聲如其時初一至初四某時正一至正四之類爲接班起早之候也

更鼓房凡有罪內臣謫司其事挨年久者一員予牌帽總之平巾烏木牌者數人佐之凡逆賢殺人皆牌子侯

得用下手今死矣餘者曰二牌曰定水牌子其餘則淨軍每夜五名輪流上元武門樓打更自起三更三點起至五更三點止按數日用藤條擊鼓檀木榔頭擊點例只一更一人上樓不許攜燈晴夜尙可惟風雨晦冥苦不可言如有差誤卽責處之

甜食房掌房一員協同內官數十員經手造辦絲窩虎眼等糖裁松餅減燥等樣一切甜食于內官監討取餞金盒裝盛進安御前兼備進賜各官及欽賜閣臣等項其造法器具皆內臣自行經手絕不令人見之是以絲

窩虎眼糖外廷最爲珍味又七月十五進獻波羅蜜亦所造也

繚作卽洗帛廩掌作官一員協同內官數十員經手織造各色兜羅絨五葦等繚花素勒甲板繚及長隨火者牌繚繚惟兜羅絨織法傳自西域外無敢私織者此作與甜食房皆屬御用監轄管最寒苦可憫

裏草場在皇城內東御馬監大廳之南永樂初年建收料豆至宣德年間將中府草場之草分受始立場有倉廩也

中府草場卽舊都府草場在東安門外妣子府街永樂初創收馬草傳云是勝國時都督府故云  
天師菴草場在皇城外東北正統年間以張天師舊處建故名以上共謂之三場皆隸御馬監各有掌場太監一員貼場一二十員僉書數十員不等

甲字庫職掌銀硃烏梅靛花黃丹綠礬紫草黑鉛光粉槐花五倍子濶白三梭布苧布綿布紅花水銀礪砂藤黃蜜陀僧白芨梔子之類皆浙江等處歲供之以備御用監奏取

乙字庫職掌奏本紙票榜紙中夾等紙各省解到胖襖以備各項奏領

丙字庫每歲浙江辦納絲棉合六絲串五絲荒絲以備各項奏討而山東河南順天等處歲供棉花絨則內官之冬衣軍士之布衣皆取于此

丁字庫每歲浙江等處辦納生漆桐油紙黃熟銅白麻縹麻黃蠟牛筋牛皮鹿皮鐵線魚膠白藤建鐵等件以備御用監內官監奏准領取

戊字庫職掌河南等處解到盔甲弓矢刀廢鐵以備奏

給

承運庫職掌浙江四川湖廣等省黃白生絹以備奏討  
欽賞夷人并內官冬衣樂舞生淨衣等項用

廣運庫職掌黃紅等色平羅熟絹各色杭紗及綿布以  
備奏討

廣惠庫職掌絲織帕梳櫳扞刷錢貫鈔錠之類以備取  
用

廣積庫職掌淨盆焰硝硫黃聽盔甲廠等處成造火藥  
凡京營春秋操演皆取給于此

贓罰庫職掌沒官衣物等件或作價抵俸給官以上總  
謂之曰十庫各有掌庫一員貼庫數員僉書數十員不  
等然庫自戊字之後不全用十于者已者已也止也是  
以改用別名也逆賢自甲字庫出身惟倚任李宗政為  
掌庫餘九庫聽宗政指揮先帝時凡宮中喜慶以及萬  
壽聖節御馬監三草場并此十庫俱隨宮內關領銀鐸  
針枝箇比別衙門示優異焉復奏討關防令掌場庫者  
掌之其篆文一行直下不過曰某字庫某草場關防而  
已萬歷時在京親藩如潞王福王先帝時在京親藩如

瑞王惠王桂王各府承奉等官止有食米冬衣惟天啟年間今上信邸承奉等官俱隨宮內關賞蓋先帝友于至誼祖宗以來所希有也

漢經廠釋典具宗教兩門而誦經持咒勸化羣生此度世津梁必不可缺者我二祖列宗咸多御製序文隆重佛典自宮壺藩封以及學士大夫近而村里遠則邊塞罔不藉佛力以寓勸化布經典以堅款貢神廟在省孝侍兩宮聖母琳官梵刹徧峙郊圻丹籙梵文無遠弗屆皇城內舊設漢經廠內臣若干員每遇收選官人則撥

數十名習念釋氏經懺其持戒與否則聽人自便如遇萬壽聖節正旦中元等節于宮中啟建道場遣內大臣瞻禮揚幡挂榜如外之應付僧一般其僧伽帽袈裟緇衣亦與僧人同惟不落髮耳圓滿事畢仍各易內臣服色神廟會選擇經典精熟心行老成持齋者數員教習宮女數十人亦能于佛前作法事行香念經若尼姑然又萬曆初年馮太監保掌司禮監印時輔臣張江陵居正也時款貢伊始宣大巡撫移咨言口求佛經江陵以書答曰口王求經求僧此悔惡遷善之一機也南牝數

百萬生靈之命皆係於此天祐中華故使虎狼梟獍皆知淨修善業皈依三寶我聖祖所謂佛氏之教陰翊王化不虛哉禮曹准公咨即可題請不必別疏但今在京番僧皆淫穢之人不通經典遺去恐爲口人所輕耳所求佛經須有聖祖御製序文者乃可與之公可特作一書諭口王嘉其善念曲爲開導示之以三塗六道之苦誘之以天人福果之說及念珠坐具亦可裁與俾益其向化之心則亦調伏凶人之一大機括也聖人之道苟可以利濟生民隨俗用其教可也何必先王禮樂法度

而後爲功哉此萬厯初年事也至于三十年後于西直門外萬壽寺中建大鐘樓懸大鐘一口鐘鑄楷字佛經樣式淳古其音洪大可聞數十里是時雨暘時若香火豐足此鐘日夜撞不絕聲云十萬八千杵至天啟年間卽廢不撞今不知鐘存何處也累臣少時讀通鑑節要中芟節潘氏榮總論及宋儒崇儒重道書極厭憎釋教以爲惑世誣民最宜擯絕者後恭覲列聖御製諸經序文及舊唐書太宗文皇帝本紀所載貞觀三年十二月癸丑詔建義以來交兵之處爲義士勇夫殞身戎陣者

各立一寺命虞世南李百藥褚亮顏師古岑文本許敬宗朱子奢等爲之碑銘以紀功業又初學記此詔文曰有隋失道九服沸騰朕親總元戎致茲明罰誓牧登陴會無寧歲其有桀犬嬰此湯羅銜鬚義憤終乎握節各狗所奉咸有可嘉雖復項籍放命封樹紀以邱墳紀信捐生丹素著于圖像猶恐九泉之下尙淪鼎鑊八難之間永纏冰炭所以樹其福田濟其營魄可于建義以來交兵之處爲義士凶徒殞身戎陣者各建寺刹招延勝侶望法鼓所振變災火于青蓮清梵所聞易苦海于甘

露所司其量定處所並立寺名具爲事條以聞稱朕哀矜之意按今都城宣武門外之憫忠寺寔其一焉寺有唐刻石碑係蘇靈芝書傳爲李北海筆然有史思明字樣則非貞觀時碑可知曩臣自崇禎戊辰秋絕葷酒飯依釋氏又誦金剛等經又得詳味蓮池大師所纂彌陀疏抄菩薩戒發隱等編歡服釋教宏博誠暗助聖朝治化不淺或在至戚密友苦口勸戒所不能感格之人或自己于內典發露真可使神懣汗流至壬申春山東巡撫余公大成者博山大師弟子也因孔有德之變逮獄



酉中志卷之六  
纍臣得侍座側蒙指教且云我聖朝大明會典所載每月禁刑十日卽十齋期也凡未能長齋者先習十齋加至正五九月循誘後人慈悲方便門也蓋治世法與出世法卽儒門成已成物用行舍藏之道凡具慧性上根法器之人當終有憬然悟覺翻然懺悔者焉總憲唐公世濟長男元竑萬曆乙卯中浙江鄉試持齋二十餘年甘心恬退推精禪學亦博山大師弟子也甲戌冬唐留都召北任總憲元竑因慮日久年衰會刺血寫家書勸唐辭官唐不聽丙子秋口由宣鎮東北入犯潛從天壽

山後柳溝深入踰皇陵陷昌平薄都城殘掠畿輔竟飽颺去其冬奉旨朝官各舉素具邊才者唐薦及霍維華奉旨逮唐獄元竑聞之號泣奔北無可奈何遂復斷鹽鼓持白齋刺血寫金剛經二函叩佛祈佑丁丑夏部擬唐戍奉旨俞允以唐素有清名也唐亦不知維華于丁丑正月內已客死戍所也

番經廠習念西方梵唄經咒宮中英華殿所供西番佛像皆陳設近侍司其香火其隆德殿欽安殿香火亦各有司也凡做好事則懸挂旛榜惟此廠仍立監齋神于

門傍本廠內官皆戴番僧帽穿紅袍黃領護腰一永日  
或三晝夜圓滿萬曆時每遇八月中旬神廟萬壽聖節  
番經廠雖在英華殿然地方狹隘于隆德殿大門之內  
跳步叱而誦梵唄者十餘人而習學者數十人各戴方  
頂笠穿五色大袖袍一人在前吹大法螺一人在後執  
大鑼餘皆左持有柄圓鼓右執彎槌齊擊之緩急疎密  
各有節奏按五色方位魚貫而進視五色傘蓋下誦經  
者以進退若舞焉跳三四箇時辰方畢監齋神者傀儡  
體製法真盛甲器械高與人等如門神焉而黑面豎髮

威靈可怖於本殿宮門安之做法事畢即收於本殿庫  
中一夕有賊入庫神施法禁不能行托夢於看庫內官  
曰庫內有賊我替爾拿住了天明果然是以人皆畏之  
凡食驢肉者絕不敢入殿人則必有意外災咎食牛犬  
肉者亦不敢入蓋亦頗著靈驗人不敢犯也英華殿前  
有菩提樹二株結子可作念珠詞臣張士範作偈其序  
文畧曰大內西北之隅建有英華殿一處殿前菩提樹  
二株間係九蓮菩薩慈聖皇祖母所植葉如楸子不從  
花得乃生於葉之背拾作念珠較南產者惜不甚大然

色黃潤而分瓣之線色微白名衲多寶之神廟以聖母  
上賓奉御容於樹之東北別殿值朔望節卽親詣行禮  
每瞻仰雙樹若有栝棧之思焉因上尊號曰九蓮菩薩  
云偶禪持此珠作施備述其詳如此臣張士範敬撰小  
偈以代頌言云云初萬曆元年四月順義王俺答奏選  
得金字番經并喇嘛僧爲傳誦經典禮部通行順天府  
造金字經三部黑字經五部選得番僧兼日早回毋得  
淹滯神廟報可至十一月禮部如督臣王崇古之請給  
俺答佛像番經賞去傳經番僧二人禪衣坐具并靴襪

授在口番僧九人官仍給禪衣坐具帽靴及各給其番  
官四人綵緞

道經廠演習元教諸品經懺凡建醮做好事亦於隆德  
欽安等殿張挂幡榜穿羽流服色而雲璈清雅儼若仙  
音萬曆五年十月戊子彗星見神廟以星變特諭禮部  
建醮於朝天宮三日仍徧告各宮廟至二十六年鼎建  
乾清坤寧兩宮勅先監矩總督工程每月初四日同閣  
臣九卿入宮闕視至三十一年工始告成勅正一嗣教  
大真人張國祥卽天師也率領道侶數十員於乾清宮

西口志卷之六  
大殿啟建黃錄大醮若干日香燭輝煌齋供清美儀文  
隆備世所罕見至第三日午時有白鶴千餘於兩宮之  
上飛鳴旋繞移時方散無不嘆聖誠格天元宮鑒臨羣  
內臣仰視空中之鶴者如堵有小近侍王昇者其口大  
能容拳亦隨仰視真人一見卽曰這孽畜躲在這裏了  
云昇是得道大蝦蟆化生之人也此廠掌廠林朝者泰  
昌元年八月陞乾清宮管事王太監安極器重之改原  
姓魏陞天壽山某陵神宮掌印太監後被逆賢害死神  
廟初欲選宮女數十人令習元教爲女道士而掌壇內

臣李昇白忠林朝執奏曰不可佛教慈悲凡些微簡褻  
尙或耽待若元教諸天神將恐女子無知惹咎不便是  
以中止已上三經廠每遇收選宮人各撥數十人隸之  
凡做好事一永日或晝夜或七晝夜各有欵賞錢錠爲  
襯一總事畢易服叩頭謝恩凡三經廠將做好事之前  
須先頒旨意傳各衙門答應錢糧凡遇癸亥神廟景命  
三經廠各做好事一永日遣管事牌子贍禮凡司禮監  
掌印東廠秉筆管事牌子各進素盒十二副或八副點  
茶每廠掌廠太監一員貼廠各司房數十員於各衙門

帶銜惟番經廠韓長老神廟極所信禮稱長老而不名  
又王定安清修能琴爲先監器重云  
南海子卽上林苑總督太監一員提督太監四員管理  
僉司數十員分東西南北四圍每面方四十里總謂之  
二十四鋪各有看守牆鋪牌子淨軍若干人東安門外  
有菜廠一處是在京之外署也職掌鹿獐兔菜西瓜果  
子凡收選內官於禮部大堂同欽差司禮監官選中時  
由部之後門到此廠過一宿次日早辰點入東安門赴  
內官監又細選無遺礙者方給烏木牌候收畢請旨定

日差司禮監掌印於萬壽山前撥散之

林衡署蕃蔬署嘉蔬署良牧署提督太監一員各有掌  
署官一員貼署僉書數員職掌進官瓜蔬襍果菜栽培  
樹木鷄黃鵝黃鴨蟹小豬等項

織染所掌關防太監一員僉書十餘員職掌內承運庫  
所用色絹其署向南在德勝門裏內有空地堪爲園圍  
其染成之絹赴內承運庫交納此所工部亦有監督有  
大使有辦顏料諸項商人此所不隸內織染局

盔甲廠卽鞍轡局在都城內之東南隅掌廠太監一員

貼廠僉書數十員轄匠頭九十名小匠若干人專管營造盛甲銃砲弓矢火藥之類萬厯年間火藥忽燃者再共三十三年九月丙申申時忽響一聲烟如靈芝燒死京營領總等官九員軍人六十三名重傷者二十一名毀房屋若干間禮科蕭近高所題燒死不下數百人凡於工部領銀一萬兩則此廠六千王恭廠四千分造之工部主事一員監督之近因東西南北不便復增主事一員各監督之崇禎甲戌九月初七日天明時忽響一聲毀房屋甚多將火藥石礮遠拋於泡子河城牆下又

一石礮自空中落於民家屋上打透至炕而炕上所卧小兒不知何因在地無恙又一人繫掛於梁上頭與脚下垂止有皮無衣無肉骨形比生時頗增長許多是日也木廠匠頭蔡承祿號小泉家出殯人頗富侈冥器皆用真綾絹爲之延優娼扮十二寡婦征西故事又製火人火馬十匹各以火爆縛徧人馬身上點藥線馳跑則火起四飛紙爆逆響而人不傷是日之變人多云蔡家所致凡附近寺殿多未震動而醜殿概損也有一吳羊兒者素以食物入廠貨賣比晨已擔入忽覺眼黑耳畔

畧聞有響聲移時方甦開眼視之身已立泡子河橋上不知得何神祐而無恙也又有賣肥阜者素在崇文門裏賣後於門外賣此日偶人城索債震死於姜百戶門首肥早箱油粉狼藉見者無不悚懼奉旨將掌廠值日內臣賀堯年監督主事蔡宸恩下獄薄責之

安民廠卽王恭廠建署於都城之西南隅掌廠太監一員貼廠僉書十餘員轄匠頭六十名小匠若干名營造錢糧與盈甲廠同天啟六年五月初六日辰時忽大震一聲烈踰急霆將大樹二十餘株拔出土又有坑深數

丈烟雲直上亦如靈芝滾向東北自西安門一帶皆隳落鐵渣如麩如米者移時方止自宣武街迤西刑部街迤南將近廠房屋猝然傾倒土木在上而瓦在下殺有姓名者幾千人而闔戶死及不知姓名者又不知幾千人也凡坍平房屋爐中之火皆滅只賣酒張四家兩三間之木簿焚然其餘無燬凡死者之肢體多不全不論男女盡皆裸體未死者亦多震褫其衣帽焉真未有之變也遂改卜於西直門街北建廠先帝賜名曰安民并盈甲廠各鑄關防以給之重軍需也其舊址改爲戎政

署凡在西會議兵事卽共集面計甚便而崇禎辛未戎  
政尙書閔夢德設處錢糧修理捐俸完局云近因火藥  
局偏窄遂於宣武門街儘北街西分創新火藥局一處  
又安定門內東絛兒衚衕舊設鎗局一處係京營官軍  
自兩廠領出火藥併軍器堆積以便教場取用崇禎戊  
寅四月初五日卯時新火藥局忽震一聲損壞房屋人  
民許多至六月初二日午時安民廠大震畧滅於天啟  
六年時也八月初七日卯時局復大震且延燒草若干  
塚其湧起之烟各如靈芝如雲如浪移時方散聖明極

矜憐之發銀分賑司禮曹太監化淳親詣傷處驗看復  
施棺或席殮埋是歲頗早至庚辰四月初二午時新局  
造火藥處復響一聲損人命房屋甚多

西山陵墳各有掌府官一員僉書十餘員以供洒掃看  
守香火凡有祭祀卽本掌府官行禮

京城內外寺廟各有燒香內官十餘員及東西捨飯寺  
亦各有內官數十員或年老有病退居於此止給柴米  
冬衣靴料以終殘年此祖宗參養之澤周詳備至者也  
安樂堂在北安門裏掌房官一員掌司數十員凡在裏



西中志卷之十六  
內官及小火者有病送此處醫治痊可之日重謝房主  
消假供職如不幸病故則各有送終內官啟銅符出北  
安門內官監給棺本惜薪司給焚化柴抬至淨樂堂焚  
化皆祖宗爲中官始終之大恩也萬曆時堂內有兩人  
養病一人已死身旁無所有止有一銅盆被未死者力  
疾下牀將盆藏之死者之家人徧尋盆不見而藏盆者  
不久亦氣絕比殮時則盆覆於被內蓋內臣性貪苟得  
至死不二遂傳爲笑柄云纍臣目擊陋習心甚不甘因  
發三大願一曰不串戲實不忍將民間幼男買來付南

人教習費財耗力以供人耳目之樂終至戲散流落失  
所者多二曰不葺房實不忍隨俗陋套頻興土木取片  
時之得意失寒素之本色三曰不受故官財產是以先  
監坐化常太監病故李公永貞死後纍臣所分遺念堪  
付一笑凡內臣稍富厚者預先捐資擺酒立老衣會棺  
木會壽地會念經殯葬以爲身後眼目之榮  
淨樂堂在西直門外內官經營數人凡宮女內官無親  
屬者死後於此焚化堂有東西二塔塔有甬井皆貯骨  
灰之所客氏笞死於此焚尸

內安樂堂在金鼇玉竦橋西羊房夾道掌司其事者二  
三十人凡宮人病老或有罪先發此處待年久再發外  
之洗衣局也成化年間憲廟皇貴妃萬娘娘專寵孝穆  
皇后紀娘娘有孕曾托居此生孝廟爲中興聖帝云  
內贊禮官巡街長隨凡宮中祭祀禮儀係贊禮官職掌  
其官十餘員自答應長隨選其動作便利聲音洪亮儀  
表豐秀者爲之得穿紅圓領束金鑲帶此外又有巡街  
長隨亦自答應長隨內厯俸實挨戴平巾穿青襖微牙  
牌輪流巡歷地方有旗尉數人跟隨凡禁地有異言異

服及喧嚷犯禁者得詰而責之事大則開具連七紙手  
本名日事件稟司禮監奏處事小則責打逐出而已  
答應長隨凡收入官人先選身子偉壯有力者百餘人  
分派大輪小輪并傘扇等演習步驟凡遇謁廟朝講以  
至聖駕出外抬弓矢賞賜等箱駕回各交原處俱在元  
武門東西長庚門之外一帶廊下家住屬司禮監轄看  
守六科廊報水巡街禮儀房等項皆從此中陞補凡夜  
間那方有光亮便從宮中門縫傳出急差長隨分尋是  
何處失火登時回話凡召對宣官及欽賜大臣銀兩羊

酒等項皆長隨齋送天下文武官各藩府進到表箋禮物皆長隨接進其爲首數員有官帽日答應牌子卽司禮監奉御然不敢穿襪襪也祖宗以來凡雙月十六日例有應答牌子前往教場比試武職應襲至逆賢時欲令名下私人炫耀中外遂改差文書或監官輪挨一人往非舊制也

官下官占分兩班四撥小火者烏木牌平巾遇陞一級則內使烏木牌管官中洒掃之事有力者免之當差聽事兩班四撥內使小火者烏木牌平巾有總牌

一名二三四牌各一名每撥餘者各數十名專答應司禮監官典簿人數凡出票拿人馬房動刑裏外看守鑿鎖淨軍皆其職管夜則輪流叫火巡風隔門縫聽傳使令忙苦可憐然間多騙詐嫖賭答應官人貪忍無耻與外廷厮役相似者大抵習俗移人不能特立或爲饑寒迫耳悲夫

京城內外十六門正陽門掌門官一員管事官數十員帶管外羅城南面居中永定門凡冬至聖駕躬詣園丘郊天并耕藉田崇禎辛未年五月初一日今上因旱詣

園丘步禱咸由正陽門出也

崇文門掌門官一員管事官數十員帶管外羅城東南

左安門正東廣渠門東北之東便門崇文門俗稱海岱

門左安門俗稱礮礮門廣渠門俗稱沙窩門也

宣武門掌門官一員管事官百餘員逆賢時幾二百員

帶管外羅城西南右安門正西廣寧門西北之西便門

宣武門俗稱順成門廣寧門俗稱彰義門此京城之南

一面也

東面則朝陽門俗稱齊化門也聖駕春分躬詣朝日壇

及藩王之國則由朝陽門出再北則東直門也

西面則阜成門俗稱平則門也聖駕秋分躬詣夕月壇

則由阜成門出再北則西直門也

北面居西者得勝門也聖駕謁陵及大行帝后發引則

出此門北面居東者曰安定門萬曆丙辰七月初六日

晚大風暴雨將此門檣刮折拔清河一帶大樹無算而

皇城之北中門東上門檣俱折凡遇夏至聖駕躬詣方

澤祭地即由安定門也各掌門官一員管事官十餘員

不等與前三門亦同譏查出入交納課程以上聽正副

西中志卷之十六  
提督掌司節制而司禮監鈐轄之凡在京大小喪柩得於安定西直東直阜成崇文門發引餘四門不許喪柩出也

在京府第王府每承奉正副二員典寶官數十員公主府每中使一員閹者數十員

聖駕御前凡每日親近內臣自司禮監掌印秉筆隨堂之次而名位尊顯者曰乾清宮管事其第一員或第二員則提督兩司房者也曰打卯牌子則隨朝捧劍者也其次曰御前牌子曰暖殿則朝夕在側者也次日曰管櫃

子曰人數司房管掌司房曰御藥房御茶房曰管庫又次日曰管弓箭曰弩馬曰尙冠等四執事則并尙衣尙履管淨者也曰帶刀曰報時刻并大庖廚官後苑班上吹響器及欽安殿隆德殿英華殿之陳設以上皆穿紅近侍也曰某宮近侍則答應皇后妃嬪皇子女等近侍各數十員不等總穿紅也

御藥房提督太監正副二員分兩班餘曰近侍二三十員未進宮未穿紅者習醫官人三四十員職掌上用藥餌與太醫院相表裏凡選官人進內必檢年少者三五

西華志卷之十六  
三  
十人選醫教習讀藥性賦醫要集覽及素問脈訣等書  
祖宗以來無敢有間人入藥房者防至密也逆賢用事  
則大不然可嘆也凡聖體違和傳放御醫至日四人或  
六人吉服入宮不論冬夏必於殿門之內設炭火一盆  
中焚蒼朮雜香人人從盆上入叩頭畢第一員膝行跪  
診左手第二員跪診右手仍互更再診畢各將聖恙大  
畧面奏數言出至聖濟殿計藥開方具本御藥房用金  
罐煎進之罐口以御藥謹封緘之  
御茶房秩視御藥房分兩班牌子四員常行近侍三四

十員職司茶酒瓜果凡聖駕出朝經筵講筵御用茶及  
官中三時進膳聖駕七箸中官七箸係其職掌祖宗以  
來亦無一人敢擅入者逆賢時止伺候先帝七箸杯盃  
將中官張老娘娘合用器具一概不管而客氏逆賢王  
體乾等御前每日賜吃之膳顧奔趨供奉不敢後焉可  
慨也神廟時牌子魏學顏最有寵自打卯牌子王朝忠  
死後無人解聖意者惟學顏奏對便捷嘗備顧問日親  
信之泰昌元年八月光廟登極憫其勤勞陞秉筆尋准  
辭閒住學顏豐潤縣人未甚讀書而博聞強記敬重士

西華志卷之六  
大夫且癖好黃白之事門多異流雖屢爲丹客哄騙而  
至老不厭也萬曆丙辰科第六名中式舉人趙鳴陽遭  
第一名沈同和事敗吃累雖鳴陽未得廷試然文名籍  
甚學顏深慕之後以重聘延請至外邸訓其姪魏廷獻  
入豐潤縣庠及學顏得以秉筆予告而鳴陽在京師道  
大行復遊山西主鄭公崇周家天啟甲子冬河南獻寶  
璽後魏相國廣微等交通逆賢大工興後崔御史呈秀  
等接續布弁凡先帝一應長旨意長聖諭迴與癸亥以  
前文氣不同人頗駭異時通內導逆諸臣大布謠言於

外曰徐文輔是秀才出身趙鳴陽入幕在內南北傳播  
人多信以爲實是時今上在朱邸或亦聞之至崇禎戊  
辰六月內中府會審李永貞等而永貞輒昧心妄扳鳴  
陽蓋欲少賒目前之死誣陷人命罔恤也其年冬臺臣  
陳公乾陽偶有疏波及之奉旨下鳴陽獄時大司寇喬  
公允升總憲會公于汴咸心知其冤而奈無據乃于己  
巳七月內提取若愚并永貞姪男僕人赴都城隍廟面  
質鳴陽若愚曰永貞若愚心本不同各人自有本末扳  
者自扳不扳自不扳此形可碎此心難昧必不忍以人

之妄加已者而今亦妄加諸人也乃力爲鳴陽辨白鳴陽並不會入忠賢之幕下中外之語皆因鳴陽曾在秉筆魏學顏家教書人遂誤作入忠賢之幕也云其舉人曹泰然生員魏廷獻等可數百人皆鳴陽門人俱爲鳴陽申訴時座中問官董公羽宸等九位盡感動首肯成至癸丑登劉同升榜進士學顏至戊寅夏卒年九十餘人咸以爲得內養外丹力也

篋頭房近侍十餘員專爲皇子女請髮留髮入囊整容

之事凡誕生皇子女彌月剪胎髮百日命名後按期請髮者卽如外之每次剃頭然一莖不留如佛子焉皇子女戴元青縐紗六瓣有頂圓帽名曰爪拉帽至十餘齡留髮約年餘又擇吉入囊總束于後冬用元色紵夏用元色紗作囊濶三寸許長尺餘垂于後至選婚有妃始擇吉行冠禮此皇子事也皇女戴寸許濶小頭箍至十餘歲留髮至年餘擇吉打扒角至選婚有駙馬始擇吉上頭此皇女事也凡奏文書皆禮儀房職掌凡收生婦醫婦進宮出宮或乳婦有疾更換皆禮儀房職掌事也



貓兒房近侍三四人專飼御前有名分之貓凡聖心所鍾愛者亦加陞管事職銜牡者曰某小廝驕者曰某老爺牝者曰某丫頭候有名封則曰某管事或直曰貓管事亦隨中官數內關賞凡皇子女嬰孩時多有被貓叫得驚風薨夭者有誰敢言或只于所居近處禁止幾年可也說者曰祖宗爲聖子神孫長育深宮阿保爲侶或不知生育繼嗣爲重而寵注于一人未能溥貫魚之澤是以養貓養鴿復以螽斯百子千嬰名其門者無非藉此感動生機廣允緒耳其意良深遠哉凡聖駕所喜乘

之馬亦各賜佳名逆賢曾進先帝之馬甚多有曰飛元光等或陞馬玉帶賞馬抹布刀兒如管事之秩然總涉戲耳不可以爲訓也

宮內教書選二十四衙門多讀書善楷書有德行無勢力者任之三四員五六員不拘穿襖襪不妨原衙門原職銜而隨御司房或管櫃子關賞亦游陞玉帶騎馬仍命一秉筆提督之所教官女讀百家姓千字文孝經女訓女誠內則詩大學中庸論語等書學規最嚴能通者者陞女秀才陞女史或陞宮正司六局掌印凡聖母及

后妃禮儀等事則女秀才爲禮引禮贊禮官也凡官人有罪者發落責處整鎖或罰提鈴等名色以苦之提鈴者每日申時正一刻并天晚宮門下鎖時及每夜起更至二更三更四更之交五更則自乾清宮門裏提至日精門回至月華殿門仍至乾清宮門裏其聲方止提者徐行正步大風大雨不敢避而令聲若四字一句天下太平云神廟御居啟祥宮時則自咸和右門提至嘉德門仍回原處止焉

數萬兩除正額進御前外餘者皆提督內臣公用不係祖宗額設內府衙門之數也店有六曰寶和日和遠日順寧日福德日福吉日寶延而提督太監之廳廨則在寶和店也俱坐落戎政府街凡奉旨提督者亦無勅書傳云起自嘉靖年間裕邸差官徵收神廟時屬慈寧宮聖母李老娘娘宮中收用管事張隆齊棟等總其事先帝登極逆賢攘爲提督委掌家王朝用經理之朝用斤斤自守自愛新其廨宇寬其苛歛惟恐病商司房王惟善等至今稱之按每年販來貂皮約一萬餘張狐皮約

六萬餘張平機布約八十萬匹麤布約四十萬匹棉花約六千包定油河油約四萬五千簍芝蔴約三萬石草油約二千簍燒酒約四萬簍而都城內之燒者不與也荆油約三萬五千簍南絲約五百馱榆皮約二十馱各省香館分用也北絲約三萬筋串布約十萬筒江米約三萬五千石夏布約二十萬匹瓜子約一萬石醃肉約二百車紹興茶約一萬箱松蘿茶約二千馱雜皮約三萬餘張大麩約五十萬塊中麩約三十萬塊麩麩約六十萬塊京城自造細麩約八十萬塊而內臣勲戚自製

之麩不與也四直河油約五十簍四直大麩約一十萬塊玉約五千斤豬約五十萬口羊約三十萬隻俱各有稅而馬牛驢騾不與也如滇粵之寶石金珠鉛銅砂汞犀象藥材吳楚閩越山陝之幣帛絨貨又不與也天啟以前大概如此今又不知何項增多何項減少觀商民之通塞販貨之豐耗亦足以卜時考世云

酌中志卷之十六終

南海譚瑩校

酌中志卷之十七

大內規制紀畧

明宦官劉若愚撰

皇城外層向南者曰大明門與正陽門永定門相對者也稍東而北過公生左門向東者曰長安左門再東過玉河橋自十王府西夾道往北向東者曰東安門轉而過天師菴草場再西向北曰北安門即俗稱厚載門轉而過太平倉迤南向西曰西安門再南過靈濟宮灰廠向西曰長安右門紅柵之內門之北則登聞鼓院在焉此外圍之六門牆外周圍紅鋪七十二處也



紫禁城外向南第一重曰承天之門每年霜降後吏部等朝審刑部重囚在門前中甬道西東西甬道之南五府等衙門坐東向西吏部等衙門坐西向東吏部主筆者第一座刑部正堂第二座都察院第三座餘以次列舊時犯人朝北跪而刑部事宜亦明載各旗尉押本囚上前北面跪則是有冤者側面西向主筆者分訴今侍從之人大聲喝曰朝上跪而乃直朝西豈以西爲上耶主筆者思以上自居耶無敢言非也南二重曰端門三重曰午門魏闕兩分曰左掖門右掖門轉而向東曰東

華門向西曰西華門向北曰元武門此內圍之八門也牆外周圍紅鋪三十六處每晚有勳臣一員在闕左門內直宿每更官軍提銅鈴巡之而護城之河遠焉皇城內自北安門裏街東曰黃瓦東門門東街南曰尙衣監街北曰司設監再東曰酒醋麵局內織染局曰皮房紙房曰針工局巾帽局曰火藥局卽兵仗局之軍器庫也再東稍南曰內府供用庫曰番經廠漢經廠曰司苑局鐘鼓司再南曰新房曰都知監司禮監祖宗舊制司禮監第一層門向西與新房門一樣門之內稍南有

松樹十餘株者內書堂也先師位供安向南其楹聯曰  
學未到孔聖門牆須努力趨行幾步做不盡家庭事業  
且開懷丟在一邊聖人位之北一間則教讀書詞林先  
生所憩之所也內書堂稍北曰崇聖堂掌印公公秉筆  
隨堂公到任入門先禮之再北向南則二層門矣入此  
門再東朝南者本監公廳之大門也門外有東西二井  
西井之西一小門東井之東一小門其內皆提督監官  
文書房掌司所居房屋也古書名畫筆墨硯綾紗紙劄  
各有庫貯焉新房之北則司禮監新房之南則御馬監

也所謂新房東西一街南北一連二連三連等連連之  
十字路口各有井自逆賢專政將司禮監外層拆毀改  
爲大門向西殊失次第一層高如一層之義無知妄作  
此其一也近年仍改復舊制焉御馬監之南向西者曰  
杆子房北膳房煖閣廠廠之東門通河而門最高大啟  
閉不便遂於大門上復開一小門以便行走河之兩岸  
榆柳成行花畦分列如田家也曰南膳房再南曰明器  
廠曰混堂司內東廠尙膳監撥子斜對御馬監向東曰  
北花房亦辦膳之所也曰印綬監中書房曰蹴圓亭武

廟恆臨幸之曰內承運庫此庫掌印僉書寫字諸人所  
住之署也此路總名之東河邊其餘尙有房八區則司  
禮監印公秉筆等眾住所謂河邊直房是也過東上北  
門東中門街北則彈子房曰學醫讀書處曰光祿寺街  
南曰篋頭房再東則東安裏門俗稱牆門者過橋則東  
安門也自東上南門之東曰重華宮前曰重華門曰廣  
定門咸熙門肅雍門康和門猶乾清宮之制後有兩井  
東西有兩長街西長街則有曰興善門麗景門長春門  
清華門寧福宮延福宮嘉福宮明德宮永春宮永寧宮

延禧宮延春宮凡妃嬪皇子女之喪皆於此停靈至發  
引時出東上南門東上北門北中門北安門詣西山等  
處墳林安厝東長街則有廣順門中和門景華門宣明  
門洪慶門洪慶殿供番佛之所也又有膳房其門曰景  
和門又東則內承運庫也自東上南門迤南街東曰永  
泰門門內街北則重華宮之前門也其東有一小臺臺  
有一亭再東南則崇質宮俗云黑瓦殿景泰年間英廟  
自北狩回所居永泰門再南街東則皇史宬珍藏太祖  
以來御筆實錄要緊典籍石室金匱之書此其處也皇

酉中志卷之十一  
四  
史宓每年六月初六日奏知曦暉司禮監第一員監官  
提督董其事而稽核之看守則監工也左右小門曰鑄  
厯左門鑄厯右門再東則追光殿曰欽天閣透玲碑在  
焉世廟御製欽天頌勒於碑碑石光潤潤有豎之二近  
似卧碑製也再南則御前作也皇史宓之西過觀心殿  
射箭處稍南曰龍蒼門其南則昭明門其西南則嘉樂  
館其北曰丹鳳門列金獅二內有龍德左殿崇仁右殿  
正中廣智殿之後則飛虹橋也橋以白石爲之鑿獅龍  
魚蝦海獸水波洶湧活躍如生云是三寶太監鄭和自

西域得之非中國石工所能造也橋前右邊缺一塊中  
國補造屢易屢泐亦古迹也橋之南北有坊二曰飛虹  
戴鼈姜立綱筆橋之東西有天光雲影二亭又北壘石  
爲山山下有洞額曰秀巖以磴道分而上之其高高在  
上者乾運殿也左右各峙一亭曰御風凌雲隔以山石  
藤蘿花卉若牆壁焉又外爲永明殿最後爲圓殿引流  
水繞之曰碧環再北曰玉芝館卽睿宗獻皇帝廟也後  
殿曰大德殿外券門曰寶慶門曰延祥門佳麗門其東  
牆外則觀心殿也自皇史宓東南有門通河河上曰湧



福宮舊名澄輝閣俗云騎馬樓也迤東沿河再北則呂  
梁洪東安橋北有亭曰涵碧又北則圓龍觀焉其殿曰  
崇德是也觀中多海棠每至春深盛開時聖駕多臨幸  
之是河也從北安門外文昌宮東步糧橋入經皮房內  
織染局巾帽局御馬監之東東安門橋下至長安左門  
外迤東之玉河橋出焉北安門內街西曰安樂堂凡內  
官有病者送此調理山陵及外廠九門官不送也再南  
黃瓦西門之裏則內官監也過北中門迤西則白石橋  
萬法殿等處至大高元殿則習學道經內官之所居也

其北則裏冰窖也北中門之南曰壽皇殿右曰育秀亭  
左曰毓秀館後曰萬福閣俱萬曆三十年春添葺曰北  
果園殿之西門內有樹一株掛一鐵雲板年久樹長遂  
銜雲板於樹幹之內止露十之三誠古跡也殿之東曰  
永壽殿觀花殿植牡丹芍藥甚多曰采芳亭會景亭曰  
玩春樓其下曰壽安室曰觀德殿亦射箭處也與御馬  
監西門相對者壽皇殿之東門也殿之南則萬歲山俗  
所謂煤山者此也久向故老詢問咸云土渣堆築而成  
崇禎己巳冬大京兆劉宗周疏亦誤指爲真有煤如果

西中志卷之十一  
六  
靠此一堆土而妄指爲煤豈不臨危誤事哉我成祖建  
都之後何等強盛天下有道守在四夷豈肯區區以煤  
作山爲禁中自全計何其示聖子神孫以不廣耶山上  
樹木葱鬱神廟時鶴鹿成羣而呦呦之鳴與在陰之和  
互相響答聞於霄漢矣山之上土成磴道每重陽日聖  
駕至山頂坐眺望頗遠前有萬歲山門再南曰北上門  
左曰北上東門右曰北上西門再南過北上門則紫禁  
城之元武門也北上西門之西大高元殿也其前門曰  
始青道境左右有牌坊二曰先天明境太極仙林曰孔

綏皇祚宏祐天民又有二閣左曰昞明閣右曰朔靈軒  
內曰福靜門曰康生門曰高元門蒼精門黃華門殿之  
東北曰無上閣其下曰龍章鳳篆曰始陽齋曰象一宮  
所供象一帝君範金爲之高尺許乃世廟元修之御容  
也稍西曰石作曰圓明閣又西曰乾明門門裏迤南曰  
兵仗局曰西直房卽尙衣監之袍房也曰舊監庫屬內  
官監地方曰尙膳外監曰憩食房曰西上北門其東向  
北者則西下馬門矣紫禁城護城河一帶其在東面者  
原有祖宗所設內承運庫衙門起至北花房止有房地

而西面城河兩岸止有矮河牆羅列石作物料而已逆賢擅政乘興大工之際輒自西下馬門迤北乾明門迤南於兵仗局對門一帶造作房屋數區以爲秉筆直房於風水頗失宜又河之東北角西北角本有澡馬河石柵逆賢皆毀之改成兩方角後又悔其誤復改如故此無知紛更之明驗也說者曰改此河後先帝聖嗣不育靈臺掌印張得禮者密向客氏言之客氏向逆賢言之乃方復舊先帝皇子女雖經數產竟無一存惜哉自西上北門過西上南門向東則御用監也又南向西則銀

作局也再南過橋曰靈臺亦有觀象臺銅鑄渾天儀以測星度占雲氣焉沿河西岸而南者曰寶鈔司自西中門之西則尙寶監也再西出西苑門迤南向東曰灰池曰水碓水磨河之西土坡之上曰昭和殿擁翠宮曰趨臺陂澄淵亭又北曰紫光閣再西曰萬壽宮壽源宮嘉靖四十四年春更曰百祿宮曰五福殿承佑殿左祐祥殿右祐寧殿曰龍吉齋鳳祥館昭祥閣朗瑞居曰曜曦門耀朗門含祥門成瑞門曰永和門永順門永綏門永祉門曰納康門長寧門凝一殿其東曰萬春宮含春殿

萬和宮萬華宮萬寧宮御饌庖曰體仁門履康門啟泰門納祉門泰安門其西曰僊禧宮仙樂宮仙安宮仙明宮其朝東南起有門廿一日長寧長和長善長耀令寧攸順攸利金靜金瑞宣惠靜安康寧金寧常靜壽安廣成東和其南曰陽德永光嘉安其東曰柏木殿曰旋坡臺即兔兒山顯陽殿也曰迎仙亭牌坊二南曰福巒北曰祿渚臺上有七層牌額曰玉光光華耀耀真真境境仙仙臺曰朝元館曰景德殿大光明殿曰登豐門廣福門曰太始殿太初殿曰宣恩亭嚮祉亭一陽亭萬仙

亭後曰永吉門左安門右安門曰太極殿統宗殿總道殿曰天元閣下曰闡元保祚朝東外二門曰天平豐和曰無逸殿幽風亭落成殿金海石橋之北河之西岸向南曰玉熙殿承華殿曰寶月亭芙蓉亭曰清馥殿丹馨殿曰錦芳亭翠芬亭曰長春門昭馨門瑞芬門馥景門仙芳門馥東門馥西門曰澄碧亭騰波亭飛藹亭曰騰禧殿即黑老婆殿也曰王媽媽井河之上游倒影入水如龍宮曰乾德閣俗所云北臺是也高八丈一尺廣十七丈磴道三分三合而上之萬曆二十九年夏建乾清

宮牌子王朝忠內官監總理陳永壽董其役至天啟元年十一月十四日奉旨拆毀平之蓋猶春秋泉臺之毀矣至四年夏就其處作嘉樂殿其門曰延景門牌坊南曰福渚北曰壽岳河干有亭五中曰龍澤左曰澄祥右曰湧瑞又左曰滋香右曰浮翠總謂之五龍亭也又洞三上曰龍壽中曰玉華下曰遊仙已上俱萬曆三十年秋添其三洞至天啟元年冬拆再西則內教場也曰振武殿曰恆裕倉省斂亭稍南臨河有坊曰余祥橋其東則北開口曰洪應殿曰壇城曰轟雷軒嘯風室噓雪室

雲雨室耀電室曰清一齋寶淵門曰靈安堂精馨堂馭仙堂輔國堂演妙堂入聖居也自北開口迤南東岸曰船屋乃冬日藏龍舟之所有宏濟神祠橋之南亦有船屋焉直南曰元熙殿有馬頭左擁翠亭右飛香亭後更名曰元濶亭再南曰陟山門通裏冰窖者也又西馬頭有龍淵亭念善館又有亭曰龍湫有殿曰壽源殿卽太素殿曰正心齋博敬齋曰素左門素右門隆治門曰騰波亭滋祥亭又再南巍然若山者曰廣寒殿卽俗所云蕭后梳妝樓也萬曆七年傾頽其脊中錢元至元錢也

神廟曾分賜輔臣張居正數枚曰太液橋其坊曰堆雲積翠今止存山石基逆賢又拆毀焉再南曰圓殿卽承光殿也磚砌如城牆亦有雉堞以磴道分上之上有樓閣古松松乃數百年物霜幹虬枝紛披偃蓋凡枝之垂者皆以杉木撐之至崇禎五年因枯木難存始連根剷除此乾明門之西也其石梁如虹直跨金海通東西往來者曰玉河橋有坊二曰金鼇玉螭萬厯年間凡遇七月十五日道經廠漢經廠做法事放河燈於此橋之中空約丈餘以木坊代石亦用木闌杆橋之東岸再南曰

五雷殿卽椒園也凡修實錄成於此焚草左迎祥館右集瑞館曰太元亭聞法所曰臨漪亭水雲榭再南則至西苑門矣由玉河橋玉熙宮迤西曰櫺星門迤北曰羊房牲口房虎城在焉內安樂堂在焉櫺星門迤西曰西酒房西花房曰大藏經廠卽司禮監經廠也又西曰洗帛處園菓廠曰西安裏門甲字等十庫曰司鑰庫鴿子房街南曰惜薪司正西則西安門也櫺星門迤西街南贓罰別庫之門也門之東迤南曰蠶池曰陽德門又西曰迎和門則萬壽宮之門也曰大光明殿自陽德門外

酉中志卷之十七  
皆可以至河是河也由北安門外藥王廟西橋下入滎  
迴泲漾蓄洩惟謹蓮藕魚蝦味最鮮美且荏葦茂密水  
禽上下儼若江南風景云至冬冰凍可拖牀以木板上  
加交牀或藁薦一人前引繩可拉二三人行冰如飛積  
雪殘雲點綴如畫世廟晚年尙元修多居西內嘉靖壬  
寅正月十六日皇太子自宮中往見絕河冰而過時閣  
臣夏言詞云胡牀穩坐度層冰正咏此也神廟臨御久  
稀禁網疎濶每於河冰凍後近京貧民於皇城內外凡  
有冰處拉拖牀以餬口遇雪滿林皋坐拖牀者豔素雜

還交拉如織亦有興豪乘醉而頻往來者至春冰將泮  
間有沉溺損生愍不畏也其河自寶鈔司東與護城河  
之西派合流過長安右門之北經承天門前再東過長  
安左門之北自湧福閣會歸於皇城之巽城而總出焉  
護城河者自北開口分流經內官監白石橋大高元殿  
之東北上西門外半邊石半邊磚橋入此橋半石者防  
車輪耳大高元殿前豎石二曰宮眷人等至此俱下馬  
世廟尊崇元教無往而不敬恪也水由橋下至紫禁城  
牆下護城河而東而南經太廟之東玉芝宮飛虹橋之

西而西脈自大社大稷壇之西至靈臺寶鈔司之東總合流於湧福閣之河焉紫禁城內之河自元武之西從地溝入至廊下家由懷公橋以南過長庚橋裏馬房橋由仁智殿西御酒房東武英殿前思善門外歸極門北皇極門前會極門北文華殿西而北而東自慈慶宮前徽音門外蜿蜒而南過東華門古今通集庫南從紫禁成牆下地溝亦自巽方出歸護城河或隱或見總一脈也神廟久不臨御河遂壅塞不通幫石圯泐者多逆賢時勒令疏通至今清流可鑒雖魚鼈蛙黽之微亦得沐

天波之澤但恐事久禁弛仍復阻閉龍脈耳是河也非爲魚泳在藻以資游賞亦非故爲曲折以耗物料恐意外回祿之變此水實可賴天啟四年六科廊災六年武英殿西油漆作災皆得此水之力而鼎建皇極等殿大工凡泥灰等項皆用此水回想祖宗設立良有深意惟在後之人遵守何如耳况坤寧宮後苑魚池之水慈寧宮魚池之水各立有水車房用驢拽水車由地窖以運輸咸賴此河又如天啟年一號殿噦鸞宮被災者二次如只靠井中汲水能救幾何耶疏通此河脈誠急務也



西中志卷之十七  
大明門內承天門其門裏之東一門內則太廟也西一門內則大社大稷也曰端門內則六科也東曰闕左門再東則松林會堆處也西曰闕右門其中魏然而向明者午門也鐘鼓在焉旗纛在焉曰左掖門右掖門門內居中向南者曰皇極門即奉天門也俗所云鑼兒天銅壺滴漏在此其左曰宏政門即東角門考選通政司參議及鴻臚寺官皆在此也右曰宣治門即西角門也居西向東曰歸極門即右順門居東向西曰會極門即左順門也皇極門內居中向南者曰皇極殿即奉天殿也

金磚玉瓦在殿額兩傍左向西者曰昭文閣即文樓右向東者曰武成閣即武樓也南北連屬穿堂上有滲金圓頂者曰中極殿即華蓋殿也殿兩旁東曰中左門西曰中右門正北曰建極殿即謹身殿也俱嘉靖四十年重修所改今名也殿後居中高踞三纏白玉石闌杆之上與乾清門相對者雲臺門也兩旁向後者東曰後左門西曰後右門即雲臺左右門亦曰平臺凡召對閣臣等官或於平臺即後左門也又東則景運門西則隆宗門西向南者則仁德門也乾清門外左右金獅二入門

丹陛至乾清宮大殿其扁曰敬天法祖四字崇禎元年  
八月初四日懸安係高太監時明筆也殿左曰日精門  
右曰月華門左小門曰龍光右小門曰川彩殿東西有  
廊廊後左曰昭仁殿右曰宏德殿東西各有角門宮後  
披簷東曰思政軒西曰養德軒再北則穿堂居中圓殿  
曰交泰殿其滲金圓頂亦猶中極殿之制也再北曰坤  
寧宮皇后所居也曰永祥門增瑞門萬曆二十五年二  
月添額宮之東披簷曰清暇居北迴廊曰游藝齋崇禎  
五年十月廿三日懸安者也宮後左曰景和門右曰龍

德門再北左曰端則門右曰基化門便接瓊苑東西門  
矣坤寧宮有中門曰廣運門嘉靖十四年七月初二日  
改曰坤寧門萬曆三十三年乾清坤寧俱鼎建告成至  
四十年後始御居乾清宮西暖閣乾清宮大殿之左向  
西者曰端寧殿尙冠等近侍所司御服袞冕圭玉冠帶  
錢糧貯此右向東曰懋勤殿先帝創造地炕於此恆臨  
御之王體乾等直房并乾清管事王朝忠等直房不概  
叙也此薇垣深遠之地中一路之大畧也過日精門之  
東曰崇仁門稍南曰內東裕庫曰宏孝殿神霄殿卽崇

光殿也日精門往北向南者日景明門今日順德左門則東一長街也再北向南與龍光門斜對者日咸和左門向南者景仁宮其東則東二長街也南首日麟趾門北首日千嬰門麟趾門之東延祺宮怡神殿再東日嘉德左門再東則蒼震門也此門恆閉遇掃雪修造則開孝靖皇后王老娘娘疾革時光廟每日來問安入此門至薨逝後於慈慶宮恭設靈位哭臨供安大祥禫祭後始不尙白衣冠矣咸和左門之北向西與景和門相對者日廣和左門向南日承乾宮東宮娘娘所居也東二

長街之東日永和宮廣和左門之北向西與基化門相對者日大成左門向南者日鍾粹宮今皇太子所居改日興龍宮者是也東二長街之東日景陽宮者孝靖皇后曾居之千嬰門之北並列者則乾清宮東之房五所其東後小門每月初四十四廿四打掃凡有事則開也宮正司六尙局皆在乾清宮之東以上則東一路之大畧也過月華門之西日膳廚門即遵義門向南者日養心殿也前東配殿日履仁齋前西配殿日一德軒後殿日涵春室東日隆禧館西日臻祥館殿門內向北者則

西中志卷之十七  
三  
司禮監掌印秉筆之直房也其後尙有大房一連緊靠  
隆德閣後祖制宮中膳房也逆賢移膳房於怡神殿而  
將此房改爲秉筆直房養心殿之西南曰祥寧宮宮前  
向北者曰無梁殿係世廟煉丹藥之處也其制不用一  
木皆磚石砌成者月華門之西南巍然者曰隆道閣原  
名皇極閣後更道心閣左曰仁蕩門右曰義平門此二  
門原名歸極會極世廟時改之閣之下曰仁德堂卽舊  
精一堂亦隆慶四年所更前曰仁德門萬曆二十四年  
兩宮災後開此門出入至神廟晚年移居乾清宮始閉

不恆開先年慈聖娘娘亦曾陞此閣召李戚畹至仁德  
門跪於地而宣諭切責之閣之東曰忠義室馮太監保  
李太監受魏太監伸會以室東小屋做直房至李永貞  
則懵然據忠義室而居之矣室三間黃琉璃瓦綠琉璃  
龜背腰牆其藻井椽葉皆龍鳳文永貞遇有內官監巾  
帽局呈稟公事南面而坐干天之位恬不知怪於臣子  
之義安乎欲逃誅得耶說者曰子爲左右而不切諫何  
也曩臣曰難言之矣一傳歎咻轉喉觸諱豈止此哉如  
大工關給銀兩自有司存乃必勒取領單親加磨算用

掛印號以恣侵刻當時工部工科等衙門皆以墨筆標  
日月在京各官體自應爾惟永貞獨用硃筆焉可乎原  
案在庫後人見之不知何如冷笑也此永貞之所以爲  
永貞也閣之西南過義平門則慈慶宮矣萬曆時慈聖  
李老娘娘所居泰昌元年八月皇貴妃鄭娘娘亦會居  
之光廟聖孝儿朝謁尊禮一如神廟時見仁聖陳老娘  
娘慈聖李老娘娘故事中外毫無間言從來疑端訛語  
一時冰釋王太監安調劑力也先帝登極復遷鄭老娘  
娘於一號殿之仁壽宮請神廟東宮昭妃劉老娘娘於

慈寧宮居住天啟七年八月後熹廟皇貴妃范娘娘亦  
共居此宮非制也此王體乾之誤也月華門往北曰順  
德右門則西一長街也再北向東與鳳彩門斜對者曰  
咸和右門卽廣安門向南者曰毓德宮卽長樂宮萬曆  
四十四年冬更曰永壽宮逆賢曾以此爲蹴鞠處其西  
則西二長街也南首曰螽斯門北首曰百子門螽斯門  
西曰啟祥宮神廟自兩宮災初移居於毓德宮後復移  
此萬曆三十年春聖體不豫召輔臣沈一貫至此宮此  
乃獻皇帝發祥之所原名未央宮世廟入繼大統至四

酉中志卷之十一  
十年夏更曰啟祥宮宮門內石坊向北扁石青地金字  
四曰貞源茂始後更曰聖本肇初向南四字曰慶澤無  
終後更曰元德永衍凡舊隸興邸錢糧至今曰未央宮  
改進乾清宮也再西則嘉德右門卽景福門也其兩旛  
竿插雲向南建者隆德殿也舊名立極寶殿隆慶元年  
改今名供安三清上帝諸尊神萬曆四十四年冬被災  
天啟七年三月修葺崇禎五年九月內將諸像移送朝  
天等宮安藏六年四月十五日更名中正殿東配殿曰  
春仁西配殿曰秋義東順山曰有容軒西順山曰無逸

齋再西北曰英華殿卽降禧殿供安西番佛像殿前有  
菩提樹二株婆娑可愛結子堪作念珠又有古松翠柏  
幽靜如山林十三年秋殿復供安聖像如前葢體祖宗  
以來神道設教之意也自嘉德右門之西向南者曰二  
南門門之北則八角井也水不堪汲天啟六年亦會修  
濬而味不改真廢井矣正北曰四德門再西曰咸安宮  
穆廟繼選皇后陳老娘娘居此天啟年間客氏移住者  
咸和右門之北向東與隆福門相對者曰廣和右門向  
南者曰翊坤宮西宮李娘娘之所居也西二長街之西

曰永寧宮先帝改曰長春宮成妃李老娘娘會居之及  
遭革封之後移於乾西某所居焉廣和門向東與端則  
門相對者曰大成右門向南者曰儲秀宮西二長街之  
西曰咸福宮神廟時惠王桂王共居之百子門之北並  
列者則乾清宮西之房五所其西後小門凡有事則開  
如東後小門總乾清門官經管啟閉也以上則西一路  
之大畧也東西後小門之外皆有惜薪司貯柴炭之園  
備宮中進用坤寧之後則宮後苑也欽安殿在焉供安  
元天上帝之所也有門曰天一之門殿之東西有足跡

二相傳世廟時兩宮回祿之變元帝曾立此默爲救火  
其靈跡顯佑云崇禎五年秋隆德殿英華殿諸像俱送  
至朝天等宮大隆善等寺安藏惟此殿聖像不動也曰  
承光門集福門延和門苑內曰萬春亭千秋亭曰對育  
軒清望閣曰金香亭玉翠亭曰樂志齋曲池館曰四神  
祠觀花殿萬曆十一年拆去壘塚石山子券門石扁名  
曰堆秀上蓋亭一座名曰御景亭東西兩處魚池二其  
東曰遊碧亭西曰澄瑞亭奇花異卉禽聲上下春花秋  
月景色可人東南曰瓊苑東門西南曰瓊苑西門卽東

西中志卷之十七  
三  
一長街西一長街之北首也其南首則東西夾牆也欽  
安殿後坤寧門嘉靖十四年秋更名曰順貞門其宮牆  
外則紫禁城之元武門報夜更鼓在焉逆賢時更鼓房  
牌子侯得用慘毒無比較外之許顯純爲更甚凡需索  
不遂而心欲斃之則用連七紙寫病重手本一件藏於  
身邊叩見逆賢探其口氣可以斃卽將手本呈稱病故  
回至更鼓房卽絕其命如逆賢口氣寬卽不呈手本計  
三四年間所害內官可百餘人初天啟元年秋正監名  
下曹化淳等數人發更鼓房打更得用心憐其寃設法

救解尋改謫南京如同再世亦難泯其一節之善也四  
年七月內得用欲殺打更淨軍梁暹趙進忠二命閉之  
幽室刻期必死不意趙進忠家人迫急無策遂於禁地  
用繩自縊衆人救解未死致巡視長隨得知具稟到官  
逆賢始知得用從來朦朧害人貪殘狠惡狀奏聞先帝  
卽陞梁暹爲更鼓房牌子將得用就付暹登時捶死哀  
慘萬狀肢體離折人甚快之崇禎年間曹太監化淳追  
念得用欲圖報之絕無親屬矣元武門裏迤東有廊下  
家可十一門而更鼓房則儘東首爲紫禁城之良隅也



乾清宮門圍牆之內左右廊房之朝南半間者曰東夾  
牆西夾牆又慈寧宮西第等處皆宮眷內官便溺之所  
宮牆之外磚砌券門安大石於上鑿懸孔垂之各有淨  
軍在下接盛於每月初四十四廿四日開元武門及各  
小門打掃自嘉德右門之西曰太安門其外向西曰長  
庚門凡放夫匠淘溝及修造或年老有勞宮人病故皆  
奏開此門以便出入其外自元武門迤西可九門自北  
而南過長庚橋至御酒房後牆曰長連可三十一門再  
前曰短連可三門并元武門東計之通共五十四門總

曰廊下家俱答應長隨所住各有佛堂以供香火三時  
鐘磬宛如梵宮凡遇有風之日卽輪一人大聲巡警曰  
謹慎燈燭牢插線香嚴慎如此各門所栽棗樹森鬱其  
實甘脆異常衆長隨各以麴做酒貨賣爲生都人所謂  
廊下內酒是也長庚橋南有柿一株高二丈餘每至霜  
後實懸樹杪丹色可愛凡文書房司禮監監官典簿各  
占過宿直房萬曆時李永貞整鎖十八年曾於懷公門  
住懷公者憲廟時賢監國史所稱懷恩者也此門之南  
井之北神廟時灾久缺未補逆賢專政委永貞等修補

西門志卷之十一  
一新勒碑之文崑山相國所撰其諛賢語明載居停主人字樣今此碑或仆埋不敢存矣自隆宗門外朝東者曰司禮監經廠直房日用紙劄書籍皆貯於此候御前取討過慈寧宮外層向東小門之南曰北司房卽文書房也再南曰司禮監管掌處卽兩班四撥寫所居也亦有茅房木桶爲便溺之所再東曰外膳房萬曆時每五更攢點後河邊擡來先到此後送入宮今不然也再南曰南司房卽監官典簿直房也隆宗門外朝南者亦監官典簿直房也有井存焉再南則寶寧門門外偏西大

殿曰仁智殿俗所謂白虎殿也凡大行帝后梓宮靈位在此停供其西南曰御酒房西北曰馬房監官典簿奉旨開刑拷打內犯之所門外有二大橋俗云裏馬房是也東南曰思善門門外橋西曰武英殿命婦朝皇后於此再西曰大庖廚尙膳監乃第一員總理及管理僉書所居也武英殿西南曰御用裏監乃把總等官所居再東曰南薰殿凡遇徽號冊封大典閣臣率領中書篆寫金寶金冊在此例有司禮監印公奉欽遣臨視管待該御用監裏監把總官置辦盛席伺候必殺鹿一隻蒸魚

作羹以明豐侈此盛典也又神廟靜攝久凡冬年聖節  
閣臣詣仁德門外行禮畢先監矩卽奉旨於文書房置  
酒飯管待畢必密具說帖回奏如有應行事件必借此  
轉達可十得四五誠納約自牖之義也再東曰歸極門  
所謂逍遙城者在六科廊後此門之西南礮礮之下宣  
德中置漢王高煦於銅缸炙死於此至天啟年間鼎建  
大工時官匠亦計及此逆賢曰這是國家甚麼吉祥好  
勾當存之何爲遂泯其迹從歸極門裏向西南入曰六  
科廊東西兩房掌司所居精微科及章疏在焉過皇極

門再東曰會極門凡京官上本接本俱於此各項本奉  
旨發抄亦必由此處會極門裏向東南入曰內閣輔臣  
票本清禁處也宣廟賜有文淵閣印一顆玉筋篆文凡  
進封票本揭帖聖諭勅禧用此印鈐封萬曆十四年五  
月廿二日不知何人開內閣鎖將印盜去六月朔神廟  
准補鑄賜之出會極門之東礮礮下曰佑國殿供安元  
帝聖像籤最靈像金鑄者曾經盜去鎔使惟像首屢銷  
不化盜藏之肚兜日夜隨身由此發露正法至如寶善  
門思善門乾清門仁德門平臺之西室及皇城各門皆

西口志卷之十一  
帝像也佑國殿之東則內承運庫銀兩表裏等錢糧貯藏之所也兩庫之間有槐一株自徽音門南望枝幹扶疎翠茂可愛有井一甘冽可用再東過小石橋曰香庫乃內府供用庫答應錢糧之所又稍北有庫一連坐東向西有石牌曰古今通集庫係印綬監所掌古今君臣畫像符券典簿貯此每年六月初六日曝晾如皇史宬例再北曰東華門門內有石橋橋北有樹二株曰馬纓花再北曰馬神廟御馬監該班官及良馬十餘匹在此有飛龍二大字太監蕭敬筆也會極門東向南者文華

殿也後殿匾曰學二帝三王治天下大經大法乃慈聖老娘娘御書後人以爲神廟御書也分六行每行二字前殿匾曰繩愆糾謬亦慈聖因世廟時建有省愆居是以特命小臣杜詩寫此四字爲扁以垂戒萬世殿內圍屏中數扇畫輿地圖左數扇貼文官職名右數扇貼武官職名遇陞遷則易之此係萬曆初年輔臣張文忠公居正所創造者至二十四年後神廟御居啟祥宮復另置一小圍屏高二尺餘中左右亦如之於啟祥宮前殿安設凡文華殿前後柱上對聯亦張文忠進獻王庭策

等所書寫其文曰念終始典於學期邁殷宗於緝熙殫厥心若稽周后又曰披皇圖考帝文九寓化成於几席游禮闕翔藝圃六經道顯於羹牆又曰四海昇平翠幄雍容探六籍萬幾清暇瑤編披覽惜三餘又曰縱橫圖史發天經地緯之藏俯仰古今期日就月將之益又曰西崑峙羣王之峯寶氣高騰册府東壁耿雙星之耀祥輝遙接書林殿之側有九五齋臨保室精一堂恭默室殿之後曰玉食館端敬殿理辦房過小門而北曰省愆居其制度用木爲通透之基高三尺餘下不令牆壁至地

其四圍亦不與別處接連凡遇天變灾眚聖駕居此以示修省之意先帝時塵封久矣萬厯中年後凡天下藩府差來進表內官尙膳監備辦筵宴司禮監掌印秉筆於文華殿門之西奉旨管待以昭九重親親之誼焉自天啟七年皇極殿工完以後管待藩府官人始不在文華殿門西也殿之東曰神祠內有一井每年祭司井之神於此殿之西曰崇本門殿之後爲刻漏房凡八刻水則交一時直殿監官抱時辰牌赴乾清門裏換之牌長尺餘石青地金字某時路遇者必側立讓行坐者起立

蓋敬天時之義殿之東北向後者曰聖濟殿供三皇歷  
代名醫御服藥餌之處徽音門裏亦曰麟趾門內則慈  
慶宮神廟時仁聖陳老娘娘居之內有宮四曰奉宸宮  
勗勤宮承華宮昭儉宮其園之門曰韶舞門麗園門曰  
擷芳殿薦香亭麟趾門之東曰關雎左門其內則掌印  
秉筆直房所云梨園是也西曰關雎右門再西而轉角  
向西者元輝殿光廟元妃郭娘娘選中時在南配殿住  
其總理婚典者田太監義也後福王妃鄒娘娘選中在  
正殿北一間住其總理婚典者先太監陳矩也凡三五

日卽詣妃寢殿門外問貴人起居時萬曆三十一年也  
其年冬續憂危竝議之獄興凡諸王館選中淑女候欽  
差某封某位娘娘親到元暉殿選不中者送出凡選中  
者或后或妃或王妃皆先居於此以便次第奏舉行吉  
禮也再北曰御馬監直房每日伺候御乘良馬十餘匹  
在此神廟時有進到大黑牛二隻無角大黑牛一隻亦  
饌於此再北曰御用等監庫再北朝南者曰寶善門門  
之西舊有核桃棗樹數株乃二百餘年所培植者逆賢  
因天啟二年夏風變伐去以便跑馬耳十庫之後亦有

隙地堪跑馬者逆賢從臾先帝薤其蒿萊而馳騁焉寶善門內迤東曰慈慶宮後門門之外神廟末年開一井味極甘冽北曰奉先殿卽內太廟也祖宗舊制宮外膳房原在寶寧門裏每日五更攢點後膳房牲匣約十餘楨自河邊經東華門會極歸極思善寶寧門逆賢擅改於寶善門內矣街東曰隆祀門其內則外東裕庫也街西再北曰蒼震門又街東再北並列二門向西者曰履順曰蹈和則一號殿仁壽宮之外層小門也內有噦鸞宮階鳳宮凡先朝有名封之妃嬪無名封之宮眷養老

處也各有應答養膳銀吃用至病終之後該號殿看門官稟知司禮監監官典簿題知奉旨著照某封某氏例發送此巷自寶善門亦可通元武門俗稱狗兒灣其居中門曰蓮花門也景運門南朝西者都知監之直房也隆宗門北朝東者司禮監人數之直房也五更攢點後至曉報九刻水者刻漏房官及答應長隨也隆宗門南朝東者曰協恭堂印公等過司房之處也慈寧宮慈慶宮皆有花園有井有庫藏而乾清宮兩旁各有井無花園惟鍾粹宮有松數株耳其餘宮名殿名門名或有記

西口志卷之十一  
三  
憶未直銓次失叙未能備載者敬俟後之博覽君子續  
補訂正是幸

京北沙河鞏華城有門四南曰拱京北曰鎮遼西曰威  
漢東曰展思內有駐鑾宮曰龍蹕門龍蹕殿曰廣載宮  
東曰凝禧之殿曰華鸞宮集祥宮西曰景惠之殿曰翠  
鳳宮會祉宮東曰麗春門步和門西曰延秋門宣澤門  
北曰寧遠門

天壽山紅門裏曰時陟門時陟殿曰松露殿曰肅敬殿  
曰修儀館飾容館曰聖蹟亭曰感思門感思殿曰九龍

池粹澤亭曰老君堂曰長生蹟長生亭

湖廣承天府舊名安陸州乃世祖發祥之所卽興邸也  
曰重明門麗正門曰龍飛門龍飛殿啟運殿曰卿雲門  
卿雲宮曰鳳祥宮宏載宮曰春暉門秋朗門曰純一門  
純一殿世子府曰泰禋門泰禋殿曰永配殿曰保和門  
太和門曰啟祚門曰受命御極之殿曰春霄殿曰福寧  
門慶源殿曰光熙門曰元佑宮門曰儲祉門曰元祐門  
元祐寶殿曰真宣殿曰衍法殿曰隆祥殿曰三洞閣  
說者曰史漢以來有因漏禁中語而得罪者又有不答



溫室省中何樹者今子侈言鋪張罄懷羅列得無非古人厚重不洩之意乎曩臣曰固然聞之道路如張金吾懋忠所刻規制一書止憑慈寧宮管事齊棟所言中多舛誤何以昭聖朝之盛美乎我國家左右史之溺職久矣自神廟靜攝多年起居所記注尤不能詳而內小臣獨能竊知一二揄揚鴻烈以昭一代之盛舉垂之無窮不亦可乎況若愚不幸遭罹竒冤朝不保夕筆此梗概不拘體制不循次第不過古人之西京雜記三輔黃圖類耳世之君子當不諱之朝思采風之義史失而求

諸野闕中一寓目焉未必不興發其致君澤民之念也曩臣所見如此至於園丘方澤謁陵視學耕藉閱戎一切慶典朝典經筵等儀自有儀注外廷備矣茲不概及

酌中志卷之十七終

南海譚瑩校

